



續文獻通考卷之一百二十

皇明進士雲間王圻纂輯

王禮考 朝儀二

經筵日講始末

太祖既有婺州遂分置中書省 召儒士許瓊葉瓚胡翰

吳沈汪仲山李公常金信徐夔童義戴良吳復張起敬

孫履等皆會食中書日 召二人進講經史敷陳治道

此論道講學之始

乙巳春正月 上御端門論及黃石公三

畧且口釋之起居注宋濂對曰尚書二典三謨帝王大

經大法靡不畢具願 主上留意講明 上曰吾非不

知典謨為政治之要但三畧乃用兵攻取時務所先耳

是日遂命濂以尚書進講。是年始置博士廳。令  
博士許存仁等日講尚書等書。及改元洪武之初。每令  
文學侍從之臣於御前講說經史。無定日。亦無定所。  
既而設華蓋文華武英等殿說書。以儒士沈德  
等爲之。未幾改翰林官。及殿閣大學士專其事。遂罷說  
書。然每進講。必反復討論。以求通義理之極。講畢。必議  
及政事以爲常。洪武三年庚戌春二月。上御東閣。  
命學士宋濂侍制王禕進講大學傳之十章。濂等反  
覆解說。至有土有人。上諭之曰。人者國之本。德者身  
之本。德厚則人懷。人懷則國固。故人主有仁厚之德。則  
人歸之如父母。人心歸則有土有財。自然之理也。若德

不足以懷衆。雖有財。亦何用哉。十六年癸亥秋八月。

上御謹身殿。命東閣大學士吳沈等進講周書立  
政至罔有立政用儉人。上嘆曰。有小人必敗君子。故

唐虞任禹稷。必去四凶。魯用仲尼。必去少正卯。沈進曰。  
小人懷奸。甚似忠信。不可不察。上曰。然。十八年甲

子秋九月。上御華蓋殿。大學士朱善以周易進講。  
至家人卦。上嘆曰。齊家治國。其理無二。使一家之間。

長幼內外。各盡其分。事事循理。則一家治矣。一家既治。  
達之一國。以至天下。亦舉而措之耳。朕觀其要。只在誠

實而有威嚴。誠則篤親愛之恩。嚴則無閨門之失。善對  
曰。誠如聖諭。又一日。御華蓋殿。召善進講心箴畢。

上曰人心道心有倚伏之機蓋仁愛之心生則伎害之心息正直之心存則邪詖之心消羞惡之心形則貪鄙之心絕忠慈之心萌則巧僞之心伏常持此心不爲情欲所蔽至公無私自無物我之累耳

成祖永樂二年甲申夏六月朔 御文華殿大學士楊士奇以大學講義進 上覽其文善之因諭之曰帝王之學貴切已實用講說之一切浮泛無益之語勿用且先儒謂克明峻德一章一部大學皆具士奇對曰堯舜禹湯文武數聖人凡修諸躬施于家國天下者皆大學之理誠 聖學所當先務 是年秋八月學士解縉以大學正心章講義進 上覽之因 諭縉等曰人君誠不

可有所好樂一有好樂流而不返則欲必勝理若心能靜虛事來則應事去則忘如明鏡止水自然純是天理朕每退朝默坐未嘗不思管束此心爲切要思爲人君但于宮室車馬服食玩好無所增加則天下自然無事矣 命翰林春坊諸臣分撰諸經講義與閣臣再閱有未當處悉與改正然後呈講乃以解縉屬書胡廣屬詩金幼孜屬春秋楊士奇屬易其義有疑必 召四人辨析暢而後已

宣宗宣德二年丁未春二月巳酉 御文華殿 召翰林進講離婁篇至二老歸文王童問曰伯夷太公皆處東海而歸文王及武王伐紂太公佐之伯夷叩馬而諫所

見何以不同講官對曰太公以救民爲心伯夷以君臣爲重上曰太公之心在當時伯夷之心在萬世無非爲天下生民也三年戊申春二月進講舜典上曰觀二典三謨則知萬世君臣爲治之道不出乎此曆象日月星辰以閏月定四時天道以明治水土奠高山大川別九州任土作貢地道以成克明峻德以至協和萬邦人道以建九官十二牧所掌禮樂刑政養民之道後世建官繁簡雖不同要不出乎此當時君臣都俞吁咈更相告戒用圖治功氣象藹然何後世之不能及講臣對曰明良相逢故治化之盛如此上又曰天生聖人爲後世法孔子刪書斷自唐虞使人知有堯舜所謂

萬世帝王之師也是年冬十月庚寅進講春秋上

曰聖人匡世之功憂世之心備見此書當時先王禮樂法度日以墮廢亂臣賊子接迹而起有此書而後天下知尊周又曰孔子作此書以尊周爲本孟子乃以王天下勸齊梁之君何也對曰孔子之時天下猶知崇周孟子之時不復知有周矣上曰聖賢之心實爲天下生民計孟子時不有王者興何以解生民之塗炭因命左右出菜茗以賜講官

按我朝自宣德以前每視朝畢無日不御文華殿或便殿召大臣及諸儒臣講經書各政事時經筵未有開也殿閣詞林云洪武中令儒臣更番入禁中每

日輪一員進講侍直誤者罪之如大學士吳沉嘗坐進講遲誤被劾永樂以後多渥典自設經筵後講官不復入直惟令翰林及春坊經局等官相輪侍班久之選爲展書官又自展書乃得充月講官若日講則用年資深而品秩尊者又云祖宗時講官于講書後得言時政闕失及陳論所見成祖寶訓云上視朝之暇輒召儒臣至便殿閱書史或召翰林儒臣講詢永樂以後蓋莫不然

英宗正統元年春十月始開經筵遂命禮部翰林院詳定講筵禮儀著爲制時上以幼冲嗣位大學士楊士奇等奏云去年十月宣宗皇帝御左順門召臣

士奇輩諭之曰明年春暖東宮出文華殿講書凡

內外侍從慎擇賢良庶謹之臣未幾不幸先帝上賓

臣未敢遽言此事至重不敢久默今山陵事畢乞早

開經筵以進聖學預命禮部吏部翰林院公同慎

擇講官必學問貫通言行端正老成重厚識達大體者

以供其職又曰天子就學其事體與皇太子親王

不同乞先命禮部翰林院詳定講筵禮儀制曰是

以今月初九十九日御經筵爾翰林春坊儒臣分直

侍講乃命太師英國公張輔知經筵事少傅兵部尚

書兼華蓋殿大學士楊士奇少傅工部尚書兼謹

身殿大學士楊榮禮部尚書兼學士楊溥同知經筵事

詹事府少詹事兼侍讀學士王直少詹事兼侍講學士李時勉錢習禮陳循侍讀苗衷侍講高穀修撰馬愉曹鼎兼經筵官仍賜宴及金幣有差遂爲定制續定經筵儀注每月三日日以逢二爲期歲率以二八月中旬起四十月末旬止用勳臣一人知經筵事內閣大學士一二人同知經筵事六部尚書左右都御史通政司大理寺卿及學士等官侍班翰林院春坊等官及國子監祭酒二員進講二員展書給事中御史各二員侍儀鴻臚寺錦衣衛堂上官各一員供事又鳴贊一員贊禮序班四員舉案侯伯各一人領將軍侍衛先期直殿中官于文華殿設御座及設御案于御座之

東稍南講案于御案之南稍東是日早司禮監官先陳所講四書經史各一冊置御案又各一冊置講案先四書東經西史先期輪講官撰四書經或史講章各一篇預置于冊內是日早上御奉天門早朝畢退御文華殿陞御座將軍侍衛如儀鴻臚寺官引知經筵及侍班講讀執事侍儀等官于丹陛上行五拜三叩頭禮畢以次上殿依品級東西序立知經筵官序于侍班官上侍儀御史給事中各二員于殿內之南分東西北向立序班二員舉御案置御座前二員舉講案置御座之南正中鴻臚官贊進講講官一員從東班出一員從西班出詣講案前稍南北向並立鴻臚

寺官贊鞠躬拜叩頭與平身畢展書一員從東班出進  
詣御案前跪展四書畢起退立于御案之東稍南  
講官一員進講詣御前立奏講某書講畢稍退展書  
官復詣御案前跪掩四書畢退就東班又展書官一  
員從西班出進詣御案前跪展經畢起退立于御  
案之西稍南講官一員進至講案前立奏或某經或某  
史畢少退仍展書官復詣御案前跪掩書畢退就西  
班鴻臚寺贊講官鞠躬拜叩頭與平身禮畢各退就東  
西班序班二員舉講案退置原所鴻臚寺官贊禮畢  
命賜宴鴻臚寺等官及講官皆跪承旨光祿寺官設  
宴于左順門宴畢叩頭出正統初立制如此天順

八年秋八月卽位遂開經筵日講期如舊每兩人一  
書一經講章皆預呈內閣轉付中書繕錄正副各一  
紙先日進司禮監官奏知先一晚于文華殿內寶  
座地平之南設香鶴香爐左右各一于左香爐之東稍  
南設御案講案各一皆西向案上各置所講二書以  
夾講章各壓以金尺一副至期早朝近侍內臣及知經  
筵官并內閣大學士及講官六部尚書都御史大理  
卿通政使鴻臚卿錦衣指揮使及四品以上寫講章官  
俱綉金緋袍其展書翰林官侍儀御史給事中序班鳴  
贊等俱全綉服朝畢駕起御文華殿皆隨之大漢  
將軍凡二十名導駕至左順門上退易冠帶便

服其侯伯或一人服金綉蟒衣仍領將軍趨越衆官進左順門皆分班綴行立文華殿外俟傳宣云進來則將軍先入殿內負東西墻立諸官陞陞鴻臚寺卿贊入班行禮畢以次分由殿東西門入重班立指揮則立西一班末稍前御史給事中序班六員分于中門左右北向立序班二人舉御案進上二人舉講案置中鳴贊唱進講講官各出班立講案前展書官二員出班對立鳴贊唱講官並行禮與東展書官進至地平膝行詣御案展四書官亦稍前近案俟展書官復位乃先說講某書然後申講講畢掩書稍退後原展書官仍如儀進掩書復位西展書官與講經官進退俱如前儀講畢

仍並行禮各回班序班各撤案置舊所鴻臚寺卿中跪奏禮畢上命官人每喫酒飯各官跪承旨與以次出丹陛仍行禮乃出左順門宴以官叙惟學士之坐立則序于鴻臚卿及四品以上寫講章官及展書官坐立亦序于四品以下寫講官等重職事也會典又載各官止行叩頭禮其儀大同微異如此按黃氏瑜有曰相傳景皇帝時每講畢命中官布錢于地令講官拾之以爲恩典高穀年老俯伏不便恒莫能得一講官拾以遺之識者病其媿賚

孝宗弘治元年戊申春三月十一日開經筵賜學士程敏政等宴及白金寶鑑次日上御文華殿後進講尚

書孟子及午進講大學衍義以為常講畢賜茶上  
皆呼先生而不名自是四月二十八日五月二十九日  
七月二十日皆盛暑不廢云時上最嗜經筵親儒臣  
學士張元禎矮小每進講上俯几聽之十四年辛  
酉夏四月開經筵又改初四日逢二會講定期也是月  
之初二日當會講以享太廟有旨改初三至期遇  
雨又改初四日蓋孝宗務學之勤不以事而廢如此  
十七年甲子秋九月三十日召李東陽劉健等至  
煖閣先是上御經筵罷因聽所講義退思之有得  
及是亟召東陽等至謂之曰劉機講陳善閉邪陳字  
改做陳說不是止云敷陳其說乃可耳劉健因進言昨

說以善道啟沃他他字不是上笑曰他字也不妨大  
抵講書須要明白透徹直言無諱道理皆是書上原有  
的不是纂出若不說盡也無進益且先生輩與翰林院  
是輔導之職皆所當言謝遷對曰聖明如此講官愈  
好盡心李東陽對曰今年聖學緝熙中外臣民無不  
仰戴臣等敢不仰承聖意孝宗因諭之曰先王可  
傳與他不必顧忌耳尋謂他字亦不妨蓋舊者多寓諛  
辭至是經筵知上意嚮每講必加以規諫而亦未嘗  
少忤云

世宗嘉靖二年奏准八月二十二日恭遇憲宗純皇帝  
忌辰是日經筵官各具青綠花樣衣服光祿寺仍具酒

飯續更定具素服角帶 十年十月初二日 孝潔皇

后忌辰令經筵官服青綠花樣隨侍人員淺淡衣服

是年八月 世宗御文華殿 召講臣至首揭書經君

子所其無逸章繼而講康誥惟民康乂章召誥顧畏民

君章孟子踐形章理義悅心章被袵衣鼓琴章君子反

經章是日 上御黼座橫經俯詢虚心聽納如此他日

講官劉龍進孟子至誠章 上批曰龍于至誠能動乃

云邇者黃河清是至誠之驗也未免近諛但其末云謙

以履盈約以保泰此二句却好又講官倫以訓進論語

陽膚為士師講義 上批云以訓講哀矜勿喜云是慈

悲憐憫夫慈悲二字是釋氏之教也講官魏校進書經

罪疑惟輕章講說 上批云桂萼薦校善講義朕觀其

講章並未有過人者且其前後率多諛詞難居近侍着

吏部調南京用之 十二月癸巳夏五月 召講官廖

道南進講論語高宗諒陰以下三句又明日進講大學

衍義時汪鉉為吏部尚書懇祈大學士張孚敬改題以

其有君薨聽于冢宰句也道南執不肯孚敬遂具揭帖

以進 世宗批云覽卿等奏朕悉已舊日講官徐縉講

孟敬子撤去二節人之將死不講夫死生人道之常何

諱之有如卿等言則忠諫之論何由得聞還着道南照

舊進講明日道南講畢進說云按說命夢帝賚予良弼

其代予言又云其惟不言言乃雍卽是以觀古之人君

心純乎孝。故宅憂而不暇于有言。古之人臣心純乎忠。故攝政而不嫌于代言。然必有高宗之聖。而後可以用。傳說之言。必有傳說之賢。而後可以輔高宗之德。不然。則莽操懿溫之流。又將以冢宰藉口于千萬世矣。予敬聞之。出謂鉉曰。講官欲中傷之。又明日。進講大學衍義。許敬宗立武昭儀章。及李林甫嫉李邕章。楊國忠比李輔國章。元載陷顏真卿章。盧杞嫉張鎰章。李逢吉去王守澄章。江克害戾太子章。予敬滋不悅。明年秋七月三日。輪顧鼎臣席春進講。時鼎臣飲于所識者。因大醉。悞期明日。鼎臣懼罪。向予敬說。予敬爲講。因反叅道南及蔡昂不行代講。遂謫道南于徽州。昂湖州。蓋爲鉉反噬。

也未幾皆召還

穆宗隆慶元年。定一日告。奉先殿告。几筵先五日。

命司禮監同各官詣文華殿演禮。是日上詣文華

殿左室展禮。先聖先師。又定講章於前兩日。先進

呈覽。凡假日先期傳免。

今上萬曆二年。定春講以二月十二起。至五月初二日止。

秋講以八月十二日起。至十月初二日止。不必題請。

日講儀

講官凡四員。日輪二員。先大學衍義。次貞觀政要。二書

皆不用講章。惟各以黃票書所起止。預進先日。內臣設

御案于文華殿後穿堂中。以二書并起止置案上。

至日早朝畢四講官同內閣隨駕入至殿內來日  
二講官授二臣以來日起止直講官俟召乃入穿堂  
門內行禮分班北向前後立東班當講者詣御案前  
內侍授以牙籤左右執之且指且講書則向上初展後  
掩皆屬內侍講畢完籤復位西班當講者乃進講悉如  
東儀講畢上諭先生喫酒飯皆跪承旨行禮禮前  
後皆一拜三叩頭出宴于文華門外西廡禁中謂之  
小經筵或謂之小講云會典載日講儀云凡講日  
上御文華穿殿止用講讀官內閣大學士侍班不用  
侍衛侍儀執事等官侍班講讀等官入見行叩頭禮東  
西分立先讀四書次讀經或讀史每本讀十數遍直講  
官先講四書次講經或講史務要直說大義明白易曉  
講讀後侍書官侍上習書畢各官叩頭退每三日一溫  
講將前所講書通講一遍若講官中有事故同列代講  
其直講則講畢補進

午講儀

穆宗隆慶六年定每日早閣臣及講官講畢各退上進  
煖閣少憇司禮監將各衙門章奏進上御覽閣臣等  
退西廂房伺候上有所諮問卽召至御前將本  
中事情明白敷奏覽本後閣臣率領正官恭侍上寫  
字畢若上欲再進煖閣少憇閣臣等仍退至西廂房  
伺候若不進煖閣閣臣等卽率講官再進午講講通鑑

節要完復講貞觀政要講官務將前代興亡事實直講  
明白講畢各退 上還宮 一每月三六九視朝日暫  
免講讀 上於宮中有暇將講讀過經書從容溫習或  
看字體法帖隨意寫字一幅不拘多寡 一每日定以  
日出時 上早膳畢出 御講讀午膳畢還宮  
講大學衍義儀

世宗嘉靖六年定每月初三初八十三初八二十三二十  
八日用經筵日講官二員進講 內閣大學士一員侍  
班講畢 賜茶 賜酒飯俱如日講儀  
無逸殿講儀

世宗嘉靖十年定 先一日司設監官於 無逸殿設

御座 御案及講案如 文華殿月講之儀是日質明

上具常服乘輦至 無逸殿門衆官於門外迎候

上降輦乘板輿至殿內降輿陞 御座鴻臚寺官贊各

官於殿門外入班行一拜三叩頭禮畢進入殿內各照

品級東西序立序班二員舉 御案置 御座前二員

舉講案置殿門內西邊東向設坐位鴻臚寺官贊進講

講官大學士一員出班行叩頭禮 上命賜講官坐講

官并鴻臚寺官承 旨贊叩頭訖展書官詣 御案前

跪展講章退講官坐講畢展書官詣 御案前跪掩講

章講官叩頭訖復班又大學士一員出班叩頭承 旨

坐講展書官一員展書俱如前儀序班二員舉 御案

二員舉講案退至原所鴻臚寺卿奏禮畢有旨賜宴  
衆官承旨訖退至幽風亭前迎候上乘板輿至亭  
內降輿陞御座賜宴儀具宴享

東宮出閣講學儀

太祖命學士宋濂授皇太子諸王經書大本堂後於  
文華後殿及肅皇改爲便殿遂移於殿之東廂房  
天順二年定是日早侍衛侍儀如常儀執事等官  
於文華後殿行四拜禮畢鴻臚寺官請皇太子陞  
文華殿執事官導引至殿陞座師保等官於丹陛  
上行四拜禮畢各官退出內侍官導皇太子至後殿  
陞座以書案進每日侍班侍讀講官入分班東西立內

侍展書侍讀講官以次進講叩頭而退

每日講讀儀

每日早朝退後皇太子出閣陞座內侍以書案進不  
用侍衛侍儀執事等官惟侍班侍讀講官入行叩頭禮  
畢分班東西向立內侍展書先讀四書則東班侍讀官  
向前伴讀十數遍退復原班次讀經書或讀史書則西  
班侍讀官向前伴讀亦如之務要字音正當句讀分明  
讀畢各官退一每日巳時侍讀侍講及侍書官俟

皇太子陞座畢入東西向立侍班內侍展書先講早所  
讀四書則東班侍講官進講一遍退復原班次講早所  
讀經史書則西班侍講官進講亦然務要直言解說明

白易曉講畢內侍收書訖侍書官向前侍習寫字務要  
開說筆法點畫端楷寫畢各官叩頭而退 午膳後是時

宮 從容遊息或習騎射 一每日晚讀本日所授書

各數遍至熟而止 一凡讀書三日一溫須背誦成熟

遇溫書且免授新書講官通講須曉大義 一凡寫字

春夏秋月每日寫一百字冬月每日寫五十字 一凡

遇朔望節假及大風雨雪隆冬盛暑暫停講讀寫字

孝宗弘治十一年增定 是日早內侍設書案於 文華

殿內東禮部鴻臚寺執事官於後殿行四拜禮畢鴻臚

寺官請 皇太子陞 文華殿導引至殿陞座三師三

少并官僚以次序于 丹陛上行四拜禮畢從殿左右

門入分班東西立通事舍人以書案進內侍展書侍讀

官進讀讀畢侍講官進講講畢通事舍人徹案各官叩

頭退

穆宗隆慶六年增定 是日早侍衛侍儀如常儀內侍先

設 皇太子座於 文華殿之廂房正中向西向設書案

於座之左禮部鴻臚寺執事官候 皇太子出閣導引

至東廂房陞座提調輔臣并侍班講讀等官以次序立

丹墀行四拜禮畢各官以次入東廂房分班相向立鴻

臚寺官贊起案通事舍人以講案進內侍展書侍讀官

進讀讀畢侍講官進講講畢通事舍人徹案 命賜酒

飯各官叩頭而退 其儀與天順年所定同但每日各

官先詣 文華門外東西向序立候 皇上御日講經筵畢 又題准 東宮初講之時閣臣連侍五日以後仍于每月三八日一至先行叩頭而出然後各官進入供事

### 進春儀

今上萬曆八年定 先一日鴻臚寺執事官設春案一張於 皇極殿外東王門簷下是日文武百官各具朝服待班執事官先詣 中極殿行禮如常儀鴻臚寺堂上官跪奏請陞殿導 駕官前導教坊司樂作 上御皇極殿陞座樂止錦衣衛傳鳴鞭引入序班引順天府等官先就拜位鳴贊贊鞠躬樂作四拜興平身樂止內贊

立於東王門外贊進春引入序班引順天府府尹至東王門外鴻臚寺堂上官招呼起案樂作擡案序班舉春案至正門外簷下置定樂止引入序班引府尹至案前立內贊隨至簷下立贊跪鴻臚寺堂上官傳跪外贊亦贊跪內贊贊進春府尹奏臣某等謹進某年春又奏皇太后陛下春 中宮陛下春 某王殿下春俱在午門外同候請 命司禮監官捧進請 旨承 旨畢內贊贊俯伏鴻臚寺堂上官傳俯伏外贊亦贊俯伏樂作興平身樂止引入序班將府尹引下鴻臚寺堂上官招呼起案擡案序班舉春案至原處置定府尹仍入原班立外贊贊鞠躬樂作四拜興平身樂止順天府等官

退下侍立對贊贊排班班齊文武百官入班立定鳴贊  
贊跪鴻臚寺堂上官一員於丹陛中道跪致詞云新  
春吉辰禮當慶賀致畢起身由東邊門入殿內侍立鳴  
贊贊俯伏樂作興五拜叩頭興平身樂止鴻臚寺堂上  
官殿內跪奏禮畢傳贊禮畢鳴鞭駕興百官退

進書儀 上 世宗實錄

今上萬曆五年續定 前一日設表案於皇極殿丹陛  
之東設實錄案於丹墀中教坊司設中和韶樂及大樂  
如常儀設 寶輿香亭表亭於史館前是日早錦衣衛  
設 鹵簿駕 上御中極殿具交冕服文武百官具朝  
服侍班監修總裁纂修等官具朝服至館前監修捧表

置表亭中纂修官捧實錄置寶輿中鴻臚寺官導迎實  
錄寶輿香亭用鼓樂繖蓋由 會極門下階至橋南由  
中道行表亭監修總裁等官後隨由二橋行至 皇極  
門實錄寶輿香亭由中門入表亭監修總裁等官由左  
門入至丹墀案前監修官捧表由東 王階陞置於表  
案由東北邊下纂修官捧實錄置於案樂作寶輿香亭  
鼓樂繖蓋俱退監修總裁等官侍立于石墀東 內殿  
鴻臚寺官奏執事官行禮贊五拜三叩頭訖奏請陞  
殿導 駕官前導樂作 上御皇極殿樂止鳴鞭監修  
總裁等官入班班列石墀上鴻臚寺官奏進實錄樂作  
序班舉實錄案以次由中道陞至 殿門外 上與序

班舉實錄案由中門入置于殿中樂止班首由東北邊階陞自東邊門入跪於案前贊總裁等官皆跪樂作內侍官舉實錄案入內殿置於中上復座樂止贊俯伏班首及總裁等官皆俯伏樂作興平身樂止班首復位贊鞠躬樂作贊四拜興平身樂止贊進表樂作序班舉表案置于殿中樂止贊宣表贊衆官皆跪鴻臚寺官展表宣訖贊俯伏興樂作贊鞠躬四拜平身樂止進實錄官退於石墀東侍立贊排班文武百官入班贊班齊贊跪鴻臚寺官致詞云文武百官某官臣某等恭惟世宗肅皇帝神功聖德纂述成書光華萬世羣臣懽忻禮當慶賀贊俯伏興贊鞠躬樂作贊四拜興平身樂止贊有制進實錄官仍入百官班贊跪宣制云世宗肅皇帝功德配天紀述詳實朕心懽慶與卿等同之宜訖贊俯伏樂作興平身樂止贊措笏鞠躬三舞蹈跪山呼萬歲三贊出笏贊俯伏興樂作贊鞠躬四拜興平身樂止禮畢次日司禮監官自內殿送實錄下殿仍置寶輿中用繖蓋與監脩總裁副總裁官同送至皇史宬尊藏

續文獻通考卷之一百二十終

禮部奏請

不 禮部置寶輿中用禮恭與盟則懸珠隔殿設官同

拜與平身樂九舞畢六日同爵蓋官自 內殿設寶輿

禮部奏請 山和萬歲三寶山山於贊州外與樂外寶輿設

率同之寶輿設寶輿六樂於輿平身樂上奏即設寶輿

此宗廟皇帝六殿設大樂於殿前 湖心殿設寶輿

樂上奏樂 禮部置寶輿自 人自官設寶輿官 禮部

續文獻通考卷之一百二十一

皇明進士雲間王圻纂輯

王禮考 皇明朝儀三

立后儀

國朝立 后先行欽天監擇 冊立 冊封吉日獲吉乃

命翰林院撰文前一日遣官告 天地于南北郊告

祖考于 太廟 世廟及社稷次日 命鴻臚寺于

奉天殿設 節冊寶三案 節案居中南向 冊案

東 寶案西又設 節冊寶彩輿於丹墀教坊司設中

和韶樂及大樂錦衣衛設 鹵簿駕又 命內官設

皇后受冊位于 坤寧宮設 節冊寶案於受 冊位

之北設香案於節案前內贊二人引禮二人設內樂於丹陛上至期皇帝御華蓋殿具皮弁服鴻臚寺官行禮畢奏請陛殿導駕官導駕陛座文武百官具朝服入班行叩頭禮左右侍班正副使入就位贊四拜興奏傳制俯伏興執事官舉節冊寶案由殿左門出用黃傘遮送丹墀內置綵輿中傳制官由左門出稱有制贊正副使跪宣制曰某年某月某日冊某氏爲皇后命卿等持節捧冊寶行禮贊俯伏興四拜禮畢執事舉節冊寶輿由奉天殿門左出鴻臚官奏禮畢駕輿大樂迎綵輿至右順門正副使朝北立內官舉皇后節冊寶輿由正門

入內樂迎至皇后宮門外先是引禮請皇后具禮服以候比至引禮引皇后出迎於宮門之外以宮人執扇擁護及擎執在後內官遂捧節冊寶正門入皇后隨至拜位內官以節冊寶各置于案內贊贊四拜贊宣冊寶跪宣冊女官取冊立宣于皇后左訖贊摺圭贊受冊宣冊女官以冊授女官女官跪受于皇后右立于西贊宣寶女官取寶立宣于皇后之左訖贊受寶女官以寶跪授于皇后皇后受訖以寶授女官女官跪受于皇后之右立于西贊出圭贊興內贊贊四拜禮畢內官持節由正門出皇

后送出宮門外正副遂持節復命是日受冊  
畢遂謁廟先是內官具謁告儀物翰林院撰謁告文  
至是皇帝具冕服皇后具禮服皇帝率皇后  
詣奉先殿奉慈殿崇先殿行謁告禮具如常儀  
有皇太后則冊立之次日皇帝仍具冕服皇  
后具禮服皇帝率皇后詣謁皇太后行八拜禮  
畢退內殿候皇帝易皮弁陸座贊引女官引皇  
后詣皇帝前就拜位行八拜謝恩禮畢遂還宮  
內官又卽宮中設座南向及儀仗內樂皇后易燕  
居冠帶陸座引禮二人引妃次在內親屬次六尚等  
女官次各監局內官內使俱行八拜禮欽天監又擇吉  
日皇帝具皮弁服御奉天殿頒詔布告中外次  
日文武百官上表稱賀皇帝冕服御華蓋殿受賀  
是日凡命婦皆入賀  
立皇太子儀

太祖洪武初定上御奉先殿先撰詔書至期前一日  
內使監官陳御座香案于奉天殿尚寶司設冊  
案于殿東寶案于西設詔書案於寶案之前設  
皇太子拜位于丹陛下及御座前北向是日早  
上御謹身殿具衮服皇太子御奉天門具冕服文  
武百官具朝服使臣僧道耆老人等俱入鼓三嚴上  
升輿出奉天殿皇太子入奉天門東陞自東

階進立 丹陛拜位鞠躬再拜平身跪承 制宣 制  
 官宣云 冊長子某為 皇太子 皇太子俯伏與鞠  
 躬平身遂仍至 御座前拜位受 冊寶讀 冊寶官  
 讀訖丞相以 冊寶跪授於 皇太子 皇太子受之  
 以授內使捧立 皇太子鞠躬四拜平身由東階降內  
 使昇 冊寶亭前行初降禮部尚書跪奏用 寶詣案  
 捧 詔書尚寶司卿用 寶遂以 詔書置于案禮部  
 尚書於殿西跪奏云捧 詔書赴 午門開讀畢百官  
 迎 詔至中書省頒行傳儀禮畢 上興樂作還 宮  
 樂止 是日 皇太子朝謝 中宮先是內使監官陳  
 設 皇后御座于 中宮殿上 皇太子拜位于 殿

正中及 御座前是日 奉天殿受 冊畢即詣 中  
 宮殿由東階陞進至拜位鞠躬四拜平身跪恭謝曰小  
 子某茲受 冊命謹詣 母后殿下恭謝畢與鞠躬四  
 拜平身禮畢 皇后還宮 皇太子遂出是日 諸王  
 賀 東宮內使監官設 皇太子座于 東宮侍儀司  
 設 諸王拜位于 殿庭階上正中 皇太子謝 中  
 宮行禮畢遂便服出 宮 諸王亦便服由東階陞鞠  
 躬四拜平身皆跪恭賀云小弟某茲遇長兄 皇太子  
 榮膺 冊寶不勝忻忭之至謹率諸弟詣 殿下稱賀  
 畢 諸王皆鞠躬四拜平身 皇太子還宮 諸王遂  
 出

成祖永樂甲申續定冊立 皇太子儀先期三日齋戒遣  
官祭告天地 宗廟用香帛酒脯行一獻禮前一日禮  
部及鴻臚寺官設 詔案於 奉天殿中設 節冊寶  
案於 詔案之南 節中 冊東 寶西陳中和韶樂  
鴻臚寺設 皇太子拜位于 丹陛正中設持 節等  
官拜位于 丹墀內至日 皇太子具冕服俟於文樓  
下 上服袞冕 御華蓋殿翰林院官捧 詔尚寶司  
官用 寶訖禮部官捧置於案執事官行五拜禮畢鴻  
臚官請 上御奉天殿文武百官朝服行叩頭禮侍班  
俟 皇太子由東階陞丹墀拜位百官各就丹墀拜位  
鞠躬四拜遂傳 制 皇太子及持 節等官皆跪宣

制訖俯伏興 皇太子詣 冊寶案前宣 冊官讀  
冊宣 寶官讀 寶訖以授 皇太子 皇太子以  
授內侍內侍跪受於西 皇太子與鞠躬四拜執事者  
各昇 冊寶以次前行 皇太子由東階降持 節等  
官隨之用儀仗鼓樂迎 冊寶至 文華殿行禮畢持  
節官持 節復 命禮部官奉 詔書至 承天門  
開讀頒行天下是日 皇太子具冕服詣 太廟畢至  
左順門謝 恩 上具皮弁服 御奉天殿 皇太  
子行八拜禮畢至 右順門詣 內殿 皇后服燕居  
冠服陞 內殿 皇太子于 內殿丹陛行八拜禮是  
日內官先設 太子座于 文華殿鴻臚寺設 親上

世子 郡王拜位于殿陛上是日 皇太子冕服  
陞座 親王 世子 郡王由東階陞就拜位鞠躬四  
拜跪鴻臚官一人詣殿門外正中跪致詞曰 某王  
某等茲遇 皇太子殿下榮膺 冊命禮當慶賀致詞  
畢俯伏興四拜平身 皇太子詣 武英殿見諸叔  
諸兄如洪武儀

宣宗宣德二年續定儀 齋戒及前期鴻臚寺陳設如常  
儀 上改服皮弁服御 華蓋殿執事官行五拜三叩  
頭禮畢鴻臚寺官請御 奉天殿文武百官行叩頭禮  
侍班正副使入就拜位四拜 皇太子始傳不親赴殿 制執事官  
舉 節冊寶由 殿左門出置 御道中傳 制官由

左門出稱有 制正副使跪 制曰某年某月某日  
冊立長子某為 皇太子 命卿等執 節行禮正副  
使俯伏興又四拜執事官各舉 節冊寶置繅輿中以  
黃蓋送至 左順門外正副使朝北立內官捧 節冊  
寶由正門入至 文華殿 皇太子出迎至 殿內官  
以 節冊寶置於案行四拜禮宣冊內官宣 冊訖捧  
冊內官以 冊授 皇太子 皇太子受之以授內  
侍內侍跪受立于西 寶亦如之俯伏興平身四拜內  
官持 節由 正門出至 左順門外以 節授正副  
使正副使持 節復 命是日鴻臚寺官設 詔案于  
奉天殿中翰林院官以 詔授禮部置於案迎至

奉天門開讀如常儀是日 皇太子詣 奉天殿謁告  
如常儀畢內侍引 皇太后前行八拜禮次詣 上前  
次詣 皇后前皆行八拜禮又詣 皇妃行四拜禮畢  
還 宮次日文武百官具朝服上表賀如正旦儀是日  
上具袞冕 御華蓋殿 親王先行八拜禮次執事  
官行五拜叩頭禮畢百官始入賀 九年令 皇太子  
千秋節冬至 親王及天下五品以上衙門遣官進箋  
者同在京文武百官詣 文華殿行賀 東宮舊在  
文華殿南面受朝嘉靖間以 文華殿爲 上位臨御  
別殿改覆黃瓦

世宗嘉靖十八年續定 冊立儀前期三日齋戒至日

上躬詣南郊以 冊立 皇太子告 皇天上帝 駕  
回恭詣 太廟祭告 皇祖 命大臣祭告北郊 列  
聖宗廟太社稷帝社稷朝日夕月天神地祇行事俱用  
祭服太常辨祭器通用酒果脯醢三獻 上帝神祇加  
一牛翰林院撰告文園丘祭告文武陪祀官各具祭服  
陪拜百官各具吉服并耆老生儒俱于昭享門外陪拜  
其分遣祭告北郊等官俱詣園丘陪拜畢方各詣祭所  
宗廟祭告文官五品以上武官四品以上 皇親指  
揮等官六科都給事中俱照例具服陪拜郊 廟祭告  
畢 上具常服以 冊立告聞于 母后前期鴻臚寺  
設 節冊寶案于 丹陛之東教坊司設中和韶樂及

大樂如常儀內使設 節案于 文華殿正中設 冊  
寶案于節案前設香案于 冊寶案前設 皇太子拜  
位于香案前至日錦衣衛設 大駕鹵簿百官各朝服  
入 丹墀內侍立 上具冕服 御華蓋殿鴻臚寺官  
引執事官進至 華蓋殿就次五拜三叩頭禮贊各供  
事鴻臚寺官奏請 陞殿樂作導 駕官前導 上陞  
座樂止鳴鞭報時鷄唱定時鼓訖唱排班文武百官及  
生儒耆老人等入班鴻臚寺官贊四拜樂作興樂止左  
右侍班引禮引正副使入就拜位贊四拜傳 制官跪  
奏傳 制俯伏興執事官舉 節冊寶案由 殿左門  
出置 御道中傳 制官由左門出稱有 制贊跪正

副使跪傳 制官宣 制曰嘉靖十八年二月初一日

冊立 元子某爲 皇太子 命卿等持 節行禮

贊俯伏興又四拜禮畢執事官舉 節冊寶置于綵輿

中黃蓋遮送教坊司鼓樂前導至 文華殿正副使由

中門入至 丹陛下停止保姆奉 皇太子迎于

文華殿門內正副使各捧 節冊寶置于案 節中

冊東 寶西內贊導保姆奉 皇太子就拜位贊四拜

保姆奉 皇太子拜興贊宣 冊贊跪保姆奉 皇太

子跪鴻臚宣 冊官取 冊立宣于 皇太子左宣訖

贊受 冊捧 冊官以 冊授 皇太子內侍官跪代

受以 冊授捧 冊官置于 冊案贊宣 寶鴻臚寺

宣 寶官取 寶立宣于 皇太子之右宣訖贊受  
寶捧 寶官以 寶授 皇太子內侍官跪代受以  
寶授捧 寶官置于 寶案贊俯伏與保姆奉 皇太  
子興贊四拜保姆奉 皇太子拜興禮畢正副使捧  
節由正門出于 奉天門具本復 命 冊立之明日  
上恭詣 宗廟捧 德祖神主大臣捧 列聖神主奉  
安畢 上具常服率 皇后 貴妃各具禮服保姆奉  
皇太子恭行告謝三獻如常儀畢 上具常服詣  
母后謁謝 皇后率 貴妃各具禮服保姆奉 皇太  
子詣 上前 皇后 貴妃俱代 皇太子行八拜禮  
貴妃又代 皇太子詣 皇后前行八拜禮保姆又

代 皇太子詣 貴妃前行四拜禮 上行告謝禮畢  
御奉天殿頒 詔天下如常儀遣官齎捧 御書禮  
物往各 王府報知及 詔諭朝鮮國是日文武百官  
上表行慶賀禮仍上表賀 皇太后命婦入內賀 皇  
后俱如常儀百官又以是日進箋賀 皇太子鴻臚寺  
官預設案于 文華門班首捧箋置于案行叩頭禮畢  
司禮監官捧進

穆宗隆慶二年正月甲戌禮部上 冊立 東宮儀注  
前一日遣官祭 天地 宗廟社稷至日早詣上親告  
奉先殿 世宗皇帝几筵 弘孝殿 神霄殿 俱  
用祝文祭品如常儀又前期鴻臚寺設 節冊寶案

冊東寶西節居中設綵輿丹輝東教坊設中和韶樂及大樂是日早錦衣衛設鹵簿駕上具皮弁服御中極殿執事官行禮畢鴻臚寺官奏請陞殿導駕官前導上陞座作堂下樂鳴鞭文武百官具朝服行叩頭禮左右侍班引禮引正副使入就拜位贊四拜傳制官跪奉傳制俯伏與執事官舉節冊寶案由殿左門出置御道中傳制官由左門出稱有制贊正副使跪宣曰隆慶二年三月十一日立皇子某爲皇太子命卿等持節行禮贊四拜禮畢執事官舉節冊寶置于綵輿中錦衣衛官校舉輿黃蓋遮送至會極門外正副使北向立內官捧

節冊寶由正門入至文華門內侍引皇太子出迎至文華殿內官以節冊寶置于案皇太子就拜位贊四拜贊宣冊贊跪宣冊內官取冊立宣贊授冊捧冊內官以冊授皇太子皇太子受訖以冊授內侍內侍跪受立于西贊授寶捧寶內官授寶如授冊儀贊四拜禮畢內官持節由正門出至會極門外以節授正副使報禮畢正副使得報持節待命又頒詔候冊命啟行鴻臚官卽設詔案于皇極殿中唱頒詔翰林院官以詔授禮部官置于案奉迎至承天門開讀如常儀是日皇太子詣上位前皇后前各行八拜禮畢

回宮次日文武百官具朝服上表稱賀陳設如常儀  
上具袞冕 御中極殿執事官行五拜叩頭禮畢鴻臚  
寺官奏請 陞殿導 駕官前導 上陞殿作堂下樂  
鳴鞭文武百官先行四拜禮贊進表文不宜又行四拜  
禮鳴鞭 駕輿是日文武百官上表畢進箋慶賀 皇  
太子前期內侍官于 文華殿東廊外設 皇太子座  
至日錦衣衛設儀仗教坊司設大樂百官具朝服詣  
文華門外北向立候 皇太子出 陞座作樂贊進箋  
箋文不宜贊四拜禮畢 皇太子還 宮  
今上萬曆二十九年九月十九日輔臣沈一貫傳 聖諭  
朕以 皇長子及 諸王子 冊立冠婚典禮已有

諭候 旨舉行卽今 皇長子容貌充實書做進益其  
諸王子年齡漸長前項典禮朕昨朝 聖母面奏舉  
行諸禮 聖心嘉悅卿便傳示禮部查遵舊制擇日具  
儀來行 一行欽天監擇日 一 皇太子及 諸王  
金冊金寶玉圭儀仗等件該 內府衙門備用 一 祭  
告天地 宗廟社稷合用文武大臣四員持 節捧  
冊寶合用文武大臣十五員充正副使行禮臨期奏請  
欽定 一前期三日各執事官于 文華殿演習禮  
儀 一前期一日 欽命大臣祭告天地 宗廟社稷  
至日早 上親祭告 奉先殿用告文祭品如常儀告  
畢 上親詣 慈寧宮以 冊立 冊封告聞 慈聖

宣文明肅皇太后 一前期一日鴻臚寺設 節案于  
文華殿正中設 冊寶案于 節案前 冊東 寶  
西設 詔案于殿中東設 節冊寶綵輿于 陛之  
東錦衣衛設雲盤於 詔案上設雲蓋于 殿外東華  
門內又設大樂于 午門外鴻臚寺設正副使拜位于  
丹墀列百官班次于 文華門外及 承天門外橋  
南 一前期一日內侍設 節冊寶案于 皇太子宮  
節中 冊東 寶西設香案于 冊寶案前設 皇  
太子拜位于香案前 諸王各宮內陳設同 一是日  
錦衣衛設鹵簿儀仗正副使各具朝服侍立于 丹墀  
東西文武百官各具朝服侍立于 文華門外東西

上服袞冕 御文華後殿鴻臚寺官引執事官進行五  
拜三叩頭禮畢贊各執事鴻臚寺官奏請陞 殿翰林  
院官捧 詔先行至 文華殿立于 御座東樂作導  
駕官前導 上御文華殿樂止尚寶司官以 寶置  
于案鳴鞭作樂文武百官就于 文華門外班位鴻臚  
官贊四拜樂作平身樂止東西侍班引禮引正副使就  
拜位贊四拜興平身傳 制官跪奏傳 制俯伏興由  
殿東門出西向立稱有 制贊跪正副使皆跪傳制  
官宣 冊立 皇太子及 冊封 諸王遣官行禮宣  
訖贊俯伏興四拜平身執事官各舉 節冊寶署綵輿  
中 蓋遮送教坊司鼓樂前導至 皇太子及 諸王

宮行禮內侍啟 皇太子具冕服于宮中 節冊寶至

宮門外正副使朝北立內侍引 皇太子出迎于門

外內執事捧 節冊寶由中門入置于案 節中 冊

東 寶西內侍導 皇太子隨入拜位贊四拜平身贊

行 冊禮贊跪 皇太子跪贊宣 冊內官跪捧 冊

興立宣于東宣訖贊受 冊內侍捧 冊跪授 皇太

子 皇太子受訖以授內使跪受捧置 冊案贊

宣 寶內官跪捧 寶興立宣于西宣訖贊受 寶內

侍捧 寶跪授 皇太子 皇太子受訖以授內侍內

侍跪授捧置 寶案贊俯伏興四拜平身禮畢內執事

捧 節由中門出內侍引 皇太子送 節至門外內

執事以 節授正副使內侍引 皇太子還宮正副使

持 節具本于 文華門外復 命 諸王 節冊寶

至各 宮行禮儀俱同 鴻臚官候 節冊寶俱啟

行序班徹 節冊寶案于 殿東隨奉 詔案于 文

華殿中俟綵輿俱出 文華門外文武百官就于 文

華門外班位鴻臚寺官贊四拜樂作平身樂止贊頌

詔翰林院官捧 詔授禮部官禮部官跪受 詔置于

案上雲盤內叩頭興鴻臚寺官奉 詔案由 殿東門

出禮部官隨案校尉擎雲蓋遮送 詔案至 文華門

鴻臚寺奏禮畢鳴鞭 駕興文武百官趨出伺候于

承天門外 詔案至 午門外禮部官捧 詔至綵輿

內樂作迎至 承天門上樂止百官各就位贊四拜樂  
作平身樂止贊宣讀禮部官捧 詔授宣讀官宣讀官  
同展 詔官俱升案稱有 制贊衆官跪宣訖禮部官  
捧 詔授錦衣衛置雲盤中贊俯伏興樂作四拜平身  
樂止唱搢笏鞠躬三舞蹈跪唱山呼萬歲者三唱出笏  
俯伏興樂作四拜平身樂止錦衣衛官以綵索繫雲盤  
于龍杆降下禮部官捧 詔置龍亭內鼓樂迎至禮部  
授使者頒行天下 一是日 皇太子 諸王受 冊  
寶禮畢各內侍引 皇太子 諸王詣 奉先殿謁告  
如常儀 一謁告畢內侍引 皇太子 諸王詣 慈  
寧宮謝 慈聖宣文明肅皇太后行八拜禮 一是日

內侍引 皇太子 諸王詣 上位前謝行八拜禮又  
詣 皇后前行八拜禮 一內侍引 皇太子 諸王  
詣 皇貴妃前行四拜禮 一內侍引 諸王詣 皇  
太子宮行四拜禮 一頒 詔禮畢鴻臚寺設表案于  
文華殿外教坊司設中和韶樂于 殿內及設大樂  
于 文華門內 一次日早錦衣衛設鹵簿儀仗百官  
班各具朝服侍班立于丹墀東 上服袞冕 御文華  
殿執事官行五拜三叩頭禮畢贊各供事鴻臚寺官奏  
請 陞殿樂作導 駕官前導 上御文華殿樂止鳴  
鞭樂作文武百官入班鴻臚寺官贊四拜樂作平身樂  
止唱進表樂作執事官舉表案由 殿東門入置于中

樂止贊宣表展表官詣案前取表同宣表官跪贊衆官  
皆跪宣訖贊俯伏興樂作四拜平身樂止唱搯笏鞠躬  
三舞蹈唱山呼萬歲者三唱出笏俯伏興樂作四拜平  
身樂止禮畢 駕興百官以次出 一是日文武百官  
慶賀 慈聖宣文明肅皇太后表文一通命婦慶賀  
中宮箋文一通俱捧至 文華殿外司禮監官捧進  
一是日上表禮畢內侍官于 文華門東間朝西設  
皇太子座鴻臚寺設箋案錦衣衛設儀仗教坊司設大  
樂文武百官具朝服于 文華門外北向立 皇太子  
具冕服于東廂房執事官四拜畢樂作 皇太子升座  
樂止贊鞠躬樂作四拜平身樂止唱進箋樂作執事官

舉箋案置于 文華門前北向樂止贊宣箋展箋官詣  
案前取箋同宣箋官跪贊衆官皆跪宣訖贊俯伏興樂  
作四拜平身樂止禮畢 皇太子還 宮 一遣官齎  
捧 御書禮物前往各 王府報知及 詔告天下  
詔諭朝鮮國 十月初九日內閣傳奉 聖諭朕以  
冊立 冊封禮成天下頒行 國家大慶 聖母在上  
鞠育朕躬恩同天地實自本原理宜尊稱 淑號顯揚  
朕之孝誠卿可傳示禮部遵舊制擇日具儀來行 禮  
部尚書馮琦奏二十九年十月十五日恭遇 冊立  
皇太子正位東宮 祖宗朝舊典 冊立 東宮之後  
諸司奏事者在京衙門止用奏本在外衙門務要奏本

一本啟本一本恭候 命下本部通行內外各衙門一體遵奉施行 上命且照永樂二年事例行

### 皇太子冠禮

太祖洪武元年定凡 皇太子將冠先期太史監筮日工

部製袞冕遠遊冠折上巾服翰林院撰祝文祝辭禮部

具儀注中書省承制 命某官為賓某為贊先遣官祭

告天地 宗廟 成化十四年 續定一獻禮 諭百官內使監陳 御

座香案于 奉天殿正中侍儀司設 皇太子次于

殿之東房賓贊次于 午門外 皇太子拜位于 丹

陛上正中賓贊受 制位于 皇太子拜位之西北東

向承 制官位于 御座之東西向宣 制官位于

皇太子位之東北西向賓贊拜位于內道之東北面西

上餘陳設如朝會儀至日執事官設壘洗內使監設冠

席張帷幄具褥席 御用監卽帷內陳袞服九章遠遊

冠絳紗袍折上巾緇纒犀簪二物并司尊設醴尊又于

尊東設二爵早鼓三嚴文武百官侍班 皇帝服通天

冠絳紗袍 御殿侍儀司承 制曰 皇太子冠 命

卿等行禮 成化十四年改以錦衣衛設幕次於文華殿 鴻臚寺設節案等內使陳袍服皮弁袞服鞋

帶烏等物具以箱盛翼善冠皮弁九旒冕各用 盤盛以紅袂覆之光祿寺設沐浴所及司尊所 太常博

士引 皇太子入就冠席執事者捧折上巾進賓降一

等受之右執項左執前北面祝 云云隨時撰述 畢跪而冠之贊

冠者前跪為正之 皇太子坐贊冠者跪為脫折上巾

置于箱以授內使執事捧遠遊冠進賓降二等受之進

冠如前儀贊冠者進跪簪結紘內使進服 皇太子坐

服冠如前儀執事者捧袞冕進賓降三等受之進冠亦

如前儀畢 太常博士引 皇太子降自東階由西階

升卽醴席南向坐贊冠者取爵酌醴授賓賓跪進祝云

云畢 皇太子飲訖奠爵進饌者捧饌進 皇太子食

訖執事官俱徹之太常博士引 皇太子降自西階

殿東房易朝服詣丹墀拜位賓進字辭曰奉 勅字某

太常博士啟 皇太子再拜跪聽宣 勅畢復再拜興

進 御前跪曰臣不敏敢不祗奉畢 皇帝還宮成化十四

年改定 上具皮弁服 御奉天殿傳 制辭曰朕 皇太子

禮序班引賓贊進 皇太子就冠席三加俱鴻臚寺鳴贊贊

加元服懋敬是承永介景福再加祝曰冠禮申舉以成

令德敬慎威儀維民之式三加祝曰章服咸加飭敬有

虔永固 皇圖于萬斯年畢禮部官啟 皇太子易袞

服鳴贊贊行醺禮禮部官引 皇太子降自東階由西

階陞卽醴席南向坐光祿官具禮贊進爵賓執詣席前

立祝曰旨酒孔馨嘉薦載芳受天之福萬世其昌賓跪

進爵教坊司樂奏喜千春之曲 皇太子飲訖光祿寺

具饌賓贊進饌如儀畢禮部官引 皇太子降自西階

由東階詣拜位鳴贊贊跪 皇太子跪宣戒勅官宣曰

孝事君親友于兄弟親賢愛民居仁由義毋怠毋驕茂

隆萬世 皇太子俯伏興四拜興平身禮部官捧節出

禮部官引 皇太子送節至殿門外引還東序內侍引

宮 內給事導 皇太子入 內朝見 皇后如朝正

旦儀明日謁 廟如時享禮 皇太子服袞冕執圭詣

神位前三上香復位再拜畢遂還 宮明日百官具朝

服詣 奉天殿稱賀退易公服詣 東宮稱賀 賜宴

成化十四年改當日 皇太子具冕服謁祭 奉先殿  
及 奉慈殿用樂行禮如常儀仍冕服詣 太皇太后  
皇太后位前謝並行五拜三叩頭禮明日 上皮弁  
服 御華蓋殿百官具朝服稱賀詞曰 皇太子冠禮  
既成禮當慶賀行五拜三叩頭禮就請文華  
殿行賀 皇太子禮錦衣衛設儀仗如常儀 其載在大

明集禮者云 皇太子加元服參用周文王禮冠之年

近則十二遠則十五其冠服用九旒 先是 上以

東宮師傅皆勳舊大臣當待以殊禮朝賀 東宮難同

庶僚 命禮部考古定儀禮部及翰林諸臣議今凡遇

大朝賀前期設 皇太子座于大本堂設答拜褥位于

堂中設三師賓客諭德拜位于堂前贊禮二人位于二

師之北內贊二人位于堂中俱東西相向至日 皇太

子常服陞座三師賓客諭德俱常服入位北向立 皇

太子起立南向贊禮唱鞠躬四拜 皇太子受前二拜

答後二拜禮畢而出 辛未秋九月庚戌 皇太子還

自陝西禮部奏正旦冬至及 皇太子妃誕辰公侯伯

夫人及文官四品以上武官五品以上命婦及未受封

正妻各具服赴習儀殿行賀禮仍定儀注以進 上命

武官六品正妻亦預焉餘並從之

藩王入繼大統儀

武宗正德十六年三月十四日奉 皇帝遺詔迎 上入

承大統次日 皇親駙馬司禮監太監 內閣大學士

禮部尚書等官齎捧 詔諭金符馳詣安陸 藩府奉

迎內官監工部蓋 行殿于宣武門外南向司禮監設

帷幄 御座于中尚衣監備翼善冠錦衣衛備鹵簿

大駕以候四月二十一日早文武百官出郊各具青綠

錦繡服迎 駕入 行殿朝見行四拜禮明日即 皇

帝位先期司設監設 御座于 華蓋殿設 寶座于

奉天殿 欽天監設定時鼓錦衣衛設鹵簿 大駕

尚寶司設 寶案于 奉天殿鴻臚寺設表案于 丹

陛上教坊司設中和韶樂設而不作鴻臚寺設 詔案

錦衣衛設雲蓋雲盤于 奉天殿內之東別設雲蓋于

承天門設雲輿于 午門外設宣讀案于 承天門

上西南向至日遣官祭告天地 宗廟社稷 駕由

大明門入至 文華殿省定 詔草 欽改年號畢設

酒奠于 大行皇帝几筵前 上具素服謁告畢設香

案酒奠等物于 奉天殿丹陛上 上具袞冕服行告

天地禮畢詣 奉天殿 奉慈殿謁告畢仍詣 大行

皇帝几筵前行禮畢詣 慈壽皇太后 莊肅皇后前

各行禮畢 上御華蓋殿文武百官各具朝服入丹墀

內序立鴻臚寺引執事官進至 華蓋殿傳 旨百官

免賀止行五拜三叩頭禮傳畢贊執事官行禮贊各供

事鴻臚寺正官跪奏請陞殿 上由中門出陞 寶座

錦衣衛鳴鞭欽天監報時鴻臚寺贊行五拜三叩頭禮

訖百官出至 承天門外俟翰林院官齋 詔用 寶

訖鴻臚寺官奏請頒 詔翰林院官捧 詔授禮部官

由 奉天殿左門出錦衣衛千 午門前候捧 詔置  
雲蓋雲盤中導雲輿至 承天門開讀行禮如常儀

東宮受賀儀

凡正旦冬至 東宮御 文華殿受賀先一日典 璽官

設座 殿內錦衣衛設儀仗教坊陳大樂府軍衛列甲

士旗幟錦衣衛設將軍十二人居 殿中儀禮司設箋

及文武官拜位是日執事官先行四拜禮訖各就位引

禮官引百官詣 文華門外北向立儀禮司啟 皇太

子陞座 皇太子具冕服出樂作陞座樂止百官行四

拜禮進箋贊唱衆官皆跪代致詞官致詞云具官臣某

等茲遇 正旦則云三陽交泰萬物咸新 冬至則云律應黃鍾日當長至 敬惟 皇太子

殿下茂膺景福傳 令稱有 令衆官皆跪宣 令 正旦

云履端之節冬 至云履長之節 同臻嘉慶百官行四拜禮畢

大冠大婚儀

國初 天子冠禮太史院先期奉 制筮日工部製冕服

翰林院撰祝文祝辭禮部備儀注中書省承 制命某

官攝太師某官攝太尉既定遂遣官告于天地 宗廟

行一獻禮 前一日內使監令陳 御冠席于 奉天

殿正中冕服案于 御冠席之南至日早文武百官具

朝服入班 上 御謹身殿擊鼓三嚴 御用監令奏

請 土服空頂幘雙童髻雙玉導絳紗袍 登奉天殿

卽位太師由西階升至 御席面東向立太尉亦由西

階升入立于太師之南侍儀跪奏請加元服太尉進就  
上席前少右跪搢笏脫空頂幘以授內使內使跪受  
幘置櫛箱櫛畢設纚出笏與退立于西太師進至 御  
前北向立內使監令就案取冕立于太師之左太師祝  
曰令月吉日始加元服壽考維祺以介景福內使監令  
奉冕跪授太師太師搢笏跪受冕加冠加簪纓訖出笏  
與退立于西 御用監令跪奏請著袞服訖侍儀跪奏  
就 御座遂進醴樂作太師進就 御座前北面立光  
祿寺奉酒進授太師太師搢笏受酒至 御前北面祝  
曰其醴維厚加薦令芳承天之休壽考不忘 上受酒  
祭少許啐酒訖遂以盞授內使太師太尉出 殿西門

降自西階就 丹墀拜位及文武百官皆鞠躬四拜興  
搢笏三舞蹈跪三拱手加額山呼再山呼鞠躬興  
四拜平身禮畢 上還 宮改服通天冠絳紗袍入  
宮拜謁 太后如正旦儀明日謁 太廟儀與時祭同  
又明日百官具公服稱賀 賜宴于 謹身殿並如正  
旦冬至朝賀儀

英宗天順八年三月 憲宗卽位翰林編修張元禎上疏  
勸行三年喪不報元禎引疾乞歸時禮部奉 遺詔百  
日外請行大婚禮南京吏部侍郎章綸上言先王制禮  
三年之喪達乎天子 陛下臨御之初當以孝治天下  
以道率臣民今 山陵尚新元朔未改 諒陰之中遽

講婚禮臣竊以爲不可伏望 降勅待來春行之不報  
武宗正德中章懋陳治道要務一曰勤 聖學二曰隆繼  
述三曰謹大婚言自古聖王于婚媾之始皆博訪令族  
采求淑德然後昭告 宗廟成以婚禮而未婚之前又  
必教于公宮所以成婦順也昔宋哲宗幼冲嗣位將行  
納聘其臣范祖禹上奏宜仁太后論納后所宜先知者  
四事一曰族姓二曰女德三曰隆禮四曰傳議呂希純  
則言當采德閥不宜參用陰陽數術以男女年命而勘  
婚彭汝礪又言當早擇而素教之蓋王化之始萬福之  
原選之宜精教之宜豫而禮尤不可不正也乞 命內  
閣及該部大臣考究典禮審處事宜必由德選不以色  
進當此 諒陰之時宜緩 冊立之期俟畢祥禫以成  
嘉會照依宋哲宗故事所選者暫處 太皇太后宮中  
使之觀法壺儀擇師傅保姆之賢脩德言容功之教嚴  
服飾之節陳圖史之戒凡言語坐立視聽動作一皆約  
之以禮而弗納于邪教之既成又以四事察之必有關  
睢麟趾之德葛覃樛木之行足以母儀萬國表正六宮  
然後設幄于內成以六禮以定后妃之位以正天下之  
本以對上天之不顯休命則禮行告 廟史無媿辭非  
惟古訓不違尤於孝道有光儀刑四海垂法萬世文王  
二南之化復見於今日矣

穆宗隆慶元年十一月定 東宮加冠儀注 一擇隆慶

六年二月初七日 一先期行內府衙門造辦冠服  
一遣大臣一員前期一日具特牲告 廟行一獻禮  
一欽定持節掌冠贊冠宣 勅戒大臣 一用內官  
夾持 皇太子及司冠服司幕次設冠席陳服進冠進  
袍服等執事俱 內府差用 一用啟請導引 皇太  
子諸官司尊扶 節導案引禮等執事官俱以本部并  
該司及光祿寺鴻臚寺等衙門職官用 一前期一日  
錦衣衛陳設幕次于 文華殿之東序鴻臚寺設 節  
案于殿內之北正中設香案于 節案之南設冠席于  
殿內之東上西向設醴席于西上南向內侍張帷幄  
于東序內設坐椅几案褥褥于帷中又張帷于序外陳

袍服皮弁服袞服鞋帶烏等物各以箱盛置于帷中案  
具翼善冠皮弁九旒冕各用盤盛以紅袱覆之置于東  
階之南案上光祿設盥洗所于東階冠案之南稍東設  
司尊所於醴席之西南司尊者實醴于尊側加勺冪設  
玷于尊東置二爵于玷進饌者實饌設于尊北諸執事  
者皆立于其所教坊設樂 一是日早 上具皮弁服  
御中極殿鴻臚寺奏請 陞殿傳 制遣宮文武百  
官各具朝服侍班如常儀 制詞曰朕 皇太子冠  
命卿等持 節行禮 一至期內侍導 皇太子先于  
東序帷幄中坐候持 節將至禮部官詣東序啟 皇  
太子迎 節樂作禮部官同鴻臚寺卿導 皇太子出

迎于殿門外持節官捧節入署於案退立于節案之東樂止禮部官同鴻臚寺卿導皇太子詣香案前樂作行四拜禮畢樂止持節官同賓贊并宣勅戒官序立于東南盥洗所之次一禮部官啟皇太子就冠帶席樂作禮部官同鴻臚寺卿導皇太子詣冠席內侍二夾侍皇太子卽席西南向坐樂止一行初加禮鴻臚寺鳴贊贊行初加禮樂作引禮序班引賓贊皆詣盥洗所賓贊皆措笏以次盥手訖出笏樂止鳴贊皆二人稍東南西向立賓贊官升自東階稍西向內侍揭蓋袱樂作以盤捧翼善冠陞賓降階一等受之樂止賓右手執冠後左手執冠前進皇太子席前

北向立祝曰吉月令辰乃加元服懋服是承永介景福樂作賓跪進冠興復位贊者跪正冠興立於賓後樂止禮部官啟易服皇太子入帷幄易新袍服出禮部官啟復坐一行再加禮鳴贊贊行再加冠禮樂作內侍揭蓋袱以盤捧皮弁升賓降階二等受之樂止賓右手執皮弁後左手執皮弁前進如前儀祝曰冠禮申舉以成令德敬慎威儀惟民之式樂作內侍釋翼善冠賓跪進皮弁興復位贊者跪正皮弁冠興立于賓後樂止禮部官啟易服皇太子入帷幄易皮弁服烏出禮部官啟復坐一行三加禮鳴贊贊行三加冠禮樂作內侍揭蓋袱以盤捧冕旒升賓降階三等受之樂止進如前

儀祝曰章服咸加飾敬有虔永固 皇圖於千萬年樂  
作內侍釋皮弁冠賓跪進冕旒興復位贊者跪簪結紘  
興立于賓後樂止禮部官啟易服 皇太子入帷幄易  
袞服出禮部官啟復坐 一行醴禮鳴贊贊行醴禮禮  
部官啟 皇太子詣醴席樂作禮部官同鴻臚寺卿引  
皇太子降自東階由西階升卽醴席南向坐樂止光  
祿寺官舉禮卓樂作引禮序班引賓贊詣盥洗所賓贊  
搯笏盥手訖出笏西階贊者取爵詣司尊所酌醴授賓  
賓執爵詣席前立樂止祝曰旨酒孔馨嘉薦載芳受天  
之福萬世其昌畢賓跪進爵鳴贊贊 皇太子搯圭受  
爵置于案教坊司啟樂奏喜千春之曲次啟進酒 皇

太子舉爵飲訖奠爵于案樂止光祿寺官進饌樂作饌  
至案樂止饌訖贊出圭徹卓賓贊復位 一受 勅戒  
鳴贊贊受 勅戒禮部官啟請 皇太子詣受 勅戒  
位禮部官同鴻臚寺卿引 皇太子降西階由東階詣  
拜位樂作引禮序班引宣 勅戒官詣 皇太子拜位  
稍東西向立樂止稱有 制鳴贊贊跪 皇太子跪宣  
勅戒曰孝事君親友于兄弟親賢愛民居仁由義母  
怠毋驕茂隆萬世樂作俯伏興四拜興平身樂止禮部  
官啟禮畢持 節官捧 節出樂作禮部官同鴻臚寺  
卿引 皇太子送 節至殿門外引還東序內侍引還  
宮樂止 一當日 皇太子具冕服謁祭 奉先殿

弘孝殿 神霄殿用樂行禮如常儀畢 皇太子仍具冕服詣 上前謝詣 皇后前謝俱行五拜三叩頭禮次詣 皇貴妃前行四拜禮俱用樂 一持 節及賓贊宣 勅戒等官復 命 一次日早 上具皮弁服 御中極殿鴻臚寺奏請 升殿文武百官具朝服稱賀詞曰 皇太子冠禮既成禮當慶賀行五拜三叩頭禮畢就詣 文華殿行賀 皇太子禮錦衣衛陳設儀仗如常儀疏入得 旨 弘孝殿 神霄殿亦當預告餘俱如擬 五年正月大學士李春芳等言 先朝故事 東宮未出 閣時閣臣以朔望次日行謁見禮卽今春和乞 命臣等舉行如例不惟臣等獲遂仰瞻

之私而 東宮殿下亦可閑習禮儀養成 儲德且今歲來朝官員咸願一覩 睿容請于二月上旬之吉許臣等率諸臣于 文華門朝見以慰天下臣民之心上許之 命二月二日謁見禮部奏上儀注 一前期一日內侍官設 東宮座于 文華左門外西向至日錦衣衛設儀仗于門外東西 一是日文武百官及天下來朝官員各具常服詣 文華門外北向序立候東宮具常服出陞座文武百官先入班贊鞠躬四拜禮畢分班序立鴻臚寺官引來朝官員詣前北向立本寺官致詞贊鞠躬四拜禮畢 皇太子還 宮

今上萬曆六年將大婚 慈聖太后還 慈寧宮特以

上付托少師張居正仍賜居正蟒龍衣各一襲綵段八表裏白金二百兩其勅辭云皇帝大婚禮在邇我當還本宮不得如前時常常守着看管恐皇帝不似前向學勤政有累聖德爲此深慮先生親受先帝付托有師保之責比別不同今特申諭交與先生務要朝夕納誨以輔其德用終先帝付托重義庶社稷蒼生永有賴焉先生其敬承之故諭二十四年二月禮部奏周制天子之元子冠禮之行近年則十二遠則十五國朝典禮屢參用之著于大明集禮大明會典累朝所遵行者今皇長子春秋已十有五矣揆之典禮正合行冠禮之年也先該萬曆二十

一年十二月十六日臣等欽奉聖諭皇長子出閣在邇合先行冠禮以見講官但思尚未冊立旣不可遽用東宮之儀又不可下同親王之服姑令暫着常服出講以待冊立之日再行冠禮如勅奉行禮科給事中楊天民奏我朝典禮皇子冠婚大都于十五歲舉行間多先時率無後期二百年來未之或改茲惟皇長子睿齡日茂已及十有五歲加冠選婚正當其候舊章可考無容愆期查得萬曆二十一年二月初八日聖旨少俟二三年中宮無出再議冊立欽此惟加冠之禮原奉聖諭待冊立并行今冠期實不容緩矧與少俟二三年之旨期會通行符合

用是謹循職掌欽奉往時 成憲及近日 新旨以請  
乞特 諭禮部擇吉具儀及時并舉則于 大典有光  
于 成命無爽矣 山陰王俊冊奏恭聞 列聖皇帝  
守器乘統必建 儲立嗣所以推至公正名分固 國  
本杜踈虞爲 宗廟社稷深遠計也竊惟 皇長子殿  
下今年十五歲當行婚禮之期是難停滯但 儲位未  
建所選何名以臣愚見婚禮固不可愆期 建儲尤不  
宜太緩 太子者國本也 國朝重典 建儲爲最今  
皇長子殿下年已長成臣聞 國有長君社稷之福  
未有位既定而名未立年既長而封未加者臣稔聞  
皇長子殿下聰明仁孝英敏溫恭中外臣民傾心共仰

此誠 天眷 皇朝社稷靈長之福也况邇年以來  
上天示儆災異頻仍庶事煩興 聖心勞虞目今第一  
急務無過 建儲一端臣思異姓之臣尚且竭忠盡職  
臣生同姓休戚攸關豈宜坐視緘默臣今老病垂死敢  
披血誠哀鳴傾吐衷赤懇望 聖明鑒裁早降 明旨  
舉此 大典慶事上寬 聖母之懷下慰臣民之望庶  
國本大定 宗社有托將頭髮剪落隨本進獻卽如  
臣身詣 闕倘蒙 聖慈鑒臣微忠從臣請則臣志  
願已畢 二十六年五月內閣傳 諭覽卿等所奏俱  
已悉知 皇長子及時冠婚 祖宗禮制天倫親情朕  
非不欲早傳行但念 皇長子素稟清弱所以遲疑者

止欲培養豐厚誠愛重之意今夏至秋朕屢召皇長子暨諸皇子問察習學之功見皇長子氣質比去歲漸加充實且書倣對句頗有進益朕甚喜悅皇長子欲先行三加冠禮次及冊立選婚朕思今未正名封而行加冠之禮冠服不便前已有旨况二宮不日落成特煥然一新行此大典庶嘉禮有所天下傳聞以便臣民具瞻若其束髮之冠須待選有婚儀擇吉冠巾與婚笄同行此亦舊制也諭卿等知之十一  
月禮部奉旨開列選婚合行事宜一請聖諭一道曉諭官民人等有女子年十四至十六容貌端莊性純美者報名在官以俟選擇一行欽天監選擇遣

官選婚吉期一先期以皇太子選婚告奉先殿行翰林院撰文告光祿寺備祭品如儀一請欽遣司禮監官二員給與勅書二道以便行事一本部遵奉聖諭出榜張掛京城內外官民之家先將淑女花名待選咨都察院轉行直隸八府并河南山東南京鳳陽淮安徐州等處地方官預將淑女報官以待遣官次第選擇一各處選中淑女令其父伴送到京所在有司給與應付脚力一各官關送到日本部照例題請欽命司禮監官赴諸王館選擇一諸王館選中女子恭候命下備查各父母身家有無違碍具揭報部送司禮監查點仍行欽天監擇吉期具題進內

看選恭候 欽定 命下施行各該衙門先期備辦婚  
禮合用物料 十一月禮部接出 聖諭朕惟  
分封 東宮及諸 親王乃 祖宗寶訓大典長幼一  
定自有次序緣因 皇長子稟質性弱氣體未克况  
皇后年在妙冲又屢遭不諱大難故不得已遲緩少俟  
耳非有別意危亂國家昨者大行 皇妣之服已滿雖  
無 三殿其 二宮不日落成 皇長子齡已過期體  
已克足你該部便具選婚舊儀來看其 冊立併加冠  
禮俟 二宮落成之日行 朕又思 皇三子 皇五  
子 皇六子 皇七子俱已長成若再少待恐又費一  
番事不若亦于 二宮完日一併加冠分封庶免煩擾

內 皇三子 皇五子歲稍長待分封之日可着出閣  
讀書親近儒臣朝夕訓誨以開蒙基 二十八年三月  
傳奉 聖諭朕仰承 天眷 祖德賜生 元子暨諸  
王子前屢 旨明白去歲以來卿等數揭上請 朕  
以 元子冊立冠婚之禮重典且原所居之宮狹小已  
着該監將 慈慶宮修飭以備移居昨該監奏已工完  
茲大典可挨次舉行其分封 諸王悉照前 旨行卿  
等宜體朕意 勅諭禮部擇日具儀來聞還出示諸臣  
不得又來煩瑣 又諭 祖宗制度 國家典禮朕審  
時察理裁奪奉行昨以 慈慶宮修葺完備 皇長子  
暨 諸王子冊立分封冠婚大典已 諭卿等撰 勅

挨次舉行但有畜物謝廷瓚乘機出位要功 朕因惡其狂妄以致少待使天下臣民曉然知出自朕躬斷定不惑于羣小之聒瀆也今卿等奏揭具見忠慎詳悉已知道了卿等可傳示諸司靜候 移居畢卽發 勅行矣不得逞臆又來聒阻特此 諭知 二十九年四月二十八日儀制司郎中王紀奏臣惟 元子者宗社之大本 勅諭者朝廷之大信 冊立一事 皇上之遷延不止十數年臣工之敦請不止百十疏中外閉目傾耳佇望旦夕舉行不虞其遲至于今請而又格也試觀祖宗朝二百年來有 元子二十歲尚未 冊立者乎尚未冠婚者乎 皇上聰明憲天政事法 祖獨于

東宮大典反徘徊顧慮殊與 祖宗家法不類今日曰俟體文明日日俟 兩宮今日曰俟移居明日曰俟珠寶乃體已充宮已成居已移珠寶已多俱無可俟矣赫赫 成命旋布旋改借此借彼誰能信之卽 皇上篤愛 元子之心足照千古第恐 父無定命則覬覦之嫌易啟 君無信旨則觀望之釁易生脫萬一如道路所揣摩誤 陛下亦卽所以誤 社稷也此之關係間不容髮且兒女待此以遂室家 聖子神孫待此以永祚胤 兩朝文武待此以慶靈長四海軍民待此以保乂安 皇上奈何持不斷之意叢無影之疑哉疏入留中 十一月初七日禮部奏慶賀事查得 累朝舊

制 皇太子加冠文武百官朝賀 皇上之後卽以朝服賀 皇太子 親王加冠文武百官朝賀 皇上之後另具吉服賀 親王載在 令典班班可考 皇太子于 文華門受賀原有定例臣等已列之儀注惟是親王舊例詣 皇極門前東廡坐百官行四拜禮今四王冠禮旣行于 文華殿之西廡而西廡之地勢偏窄百官班不能盡容相應俟賀 皇太子禮畢百官易吉服司禮監請 四王常服坐西廡內文武大臣堂上官及近侍官拜于西丹墀內庶僚拜于 文華門外近西行禮伏乞 裁定施行報可 禮部又奏慶賀事 皇太子御 文華殿東間 福王等王御西間百官

行稱賀禮 上是之 太常寺奏祭祀事初九日 皇太子及 福王等王冠禮遣官祭告 內殿 上遣駙馬萬燁行禮 二十六日禮部奏查得會典凡朔望日文武百官于 皇極殿朝參後赴 文華殿詣 皇太子前行禮暨 千秋節正且冬至令節俱合行慶賀禮請自今以後遇 皇上升 殿之日百官朝參後卽于 文華門東間設座內侍啟請 皇太子升座百官行禮如遇 皇上朔望免朝之日伏惟別有 聖裁其 千秋正且冬至令節合無照例行所據合用陳設儀仗侍衛人口當預先通行各該衛所查照施行奉 旨朕御殿之日百官詣 東宮行禮若遇免朝并 千秋

續文獻通考卷之二十二  
等節照例行

馬... 二十六日豐瑞奏...  
太子... 蘇王... 王... 蘇... 官... 祭... 告... 內... 殿... 上... 殿...  
... 蘇... 賢... 蘇... 王... 具... 之... 太... 常... 寺... 奏... 祭... 所... 畢... 所... 日... 皇...

續文獻通考卷之一百二十二

皇明進士雲間王圻纂輯

王禮考 皇明朝儀四

冊立皇妃儀

成祖永樂二年定 皇太子妃冊立儀 前一日內官設

節冊案于 東宮內殿設香案於其南設女樂儀伏

如常儀設內贊引禮女官各二人至日持 節正副使

等官捧 皇太子妃節冊至 左順門以 節冊授內

官正副使北向立俟報內官持 節冊由正門入 皇

太子妃具禮服出迎 宮門外北至 皇太子妃隨至

拜位內官置 節冊于案宣冊妃跪女官捧 冊立宣

於皇太子妃之左宣畢授冊女官取冊授皇太子妃皇太子妃受之以授女官女官跪受于皇太子妃之右妃四拜禮畢內官持節出皇太子妃送出宮外正副使持節復命皇太子妃仍具禮服謁奉先殿禮如常遂詣宮門候上具皮弁服皇后燕居冠服陞座妃就內殿行八拜禮二十二年冊立樂設而不作節冊至引贊引妃就拜位跪宣冊受冊畢行四拜禮畢詣几筵時成祖初謁告禮如常儀詣皇帝皇后謝恩禮畢詣皇妃前行四拜禮還宮詣皇太子前行四拜禮畢仍陞座侍衛如常儀王妃公主郡主及宮人女官應

賀者於丹墀內行四拜禮畢而退

世宗嘉靖十九年進封

妃嬪俱同日

皇貴妃用金冊金寶妃嬪無寶止用

鑲金銀冊錦衣衛設儀仗如朔望儀是日寅時上具常服

告于皇祖分遣文武大臣告于列聖宗廟太常寺

備香帛脯醢酒果翰林院撰告文告廟畢上具皮

弁服御華蓋殿行禮俱如常儀

冊立皇嬪儀

世宗嘉靖十年定先期太常寺備告太廟世廟香

帛脯醢酒果翰林院具祝文禮部奏請欽定持節

捧冊正副使各二員前一日鴻臚寺設節冊案于

奉天殿節案居左冊案居右設節冊綵輿于

丹墀內教坊司設中和韶樂及大樂錦衣衛設儀仗如朔望儀是日早內官設九嬪受冊位于宮中設節冊案于受冊案之比節案居左冊案居右設香案于節冊案前設內贊各三人引禮各二人至期上具衮冕服以冊封九嬪祭告太廟世廟如常儀禮畢駕回上易皮弁服御華蓋殿鴻臚寺官奏執事官行禮畢奏請陞殿導駕官導上陞座文武百官各具公服入班行叩頭禮左右侍班正副使具朝服入就拜位鳴贊贊四拜興傳制官跪奏傳制執事官舉節冊案由殿左門出置御道中傳制官由左門出稱有制鳴贊贊跪正副使跪

傳制官宣制曰嘉靖十年三月初二日冊某氏

為德嬪某氏為賢嬪某氏為莊嬪某氏為麗

嬪某氏為惠嬪某氏為安嬪某氏為和嬪某氏

為僖嬪某氏為康嬪命卿等持節行禮贊俯

伏興四拜禮畢執事官舉節冊置綵輿中傘蓋鼓樂

迎至右順門正副使北面立內官舉節冊綵輿由

正門入迎至九嬪宮中節冊未至之前引禮請

九嬪出迎于宮門外節冊至由正門入九嬪隨

至拜位內官以節冊各置于案內贊贊四拜贊宣

冊贊跪宣冊女官取冊立宣于九嬪之左訖贊受冊贊搢圭宣冊女官以冊授九嬪九嬪

以冊授女官女官跪受于九嬪之右立于西贊出  
主贊與贊四拜禮畢內官持節由正門出九嬪送  
出宮門各內官齋節出至右順門裏待齊出  
右順門外以節授正副使報禮畢正副使得報持  
節次日早復命九嬪受冊封畢各具服皇后  
率詣奉先殿奉慈殿崇先殿行謁告禮如常儀  
仍各具服詣昭聖康惠慈壽皇太后前童聖慈仁  
皇太后前莊肅皇后前俱行八拜禮畢候上服皮  
弁服皇后亦具服各陞座贊引女官引詣前就拜  
位行八拜禮畢各回宮  
遣使持節儀

太祖洪武二十五年令允傳制遣使持節俱由東階

左行

世宗嘉靖十五年諭鴻臚寺凡遣使冊立冊封正

使立于御道之左副右拜命而行

后妃謁廟儀

世宗嘉靖十三年前期太常寺奏皇帝齋三日尚儀奏

皇后及妃各齋三日內外諸執事各齋一日太常光  
祿官奏省牲如常儀所司陳設如時裕儀是日質明有  
司整嚴以俟錦衣衛備儀衛如常儀內使監設皇帝

皇后及妃肩輿于各宮中皇后及妃受冊禮

畢錦衣衛進輅于奉天門尚儀備皇后及妃翟車

于輅後以序內使監奏中嚴外辦 皇帝 皇后及  
妃各陞輿出 宮至 奉天門錦衣衛官奏請降輿陞  
輅 皇帝降輿陞輅尚儀奏請降輿陞車 皇后及  
妃各降輿陞車內外護衛儀仗隨從內執事女官遮以  
幃幕從行至 太廟之大門西奏請降輅 皇帝降輅  
奏請降車 皇后及 妃降車障以龍幃導 駕官導  
皇帝入 皇后及 妃從至 廟之後寢先是 命  
官捧 七廟主陞 神御座退至是 皇帝捧 太祖  
高皇帝主 皇后捧 孝慈高皇后主出陞殿之 神  
御座典儀唱執事官各司其事內贊奏就位 皇帝  
皇后及 妃各就拜位典儀唱迎神樂作內贊奏跪搢

主上香 皇帝跪搢主司香跪捧香進于 皇帝之左  
皇帝上香訖內贊奏出主復位 皇帝出主復位樂  
止內贊奏四拜 皇帝 皇后及 妃皆四拜奏興平  
身典儀唱奠帛行初獻禮樂作內贊奏搢主 皇帝搢  
主奏奠帛捧帛官以帛跪進于 皇帝之右 皇帝受  
帛奠訖奏獻爵執事官以爵跪進于 皇帝之右 皇  
帝受爵獻于 太祖神御前奏出主奏搢主 皇帝搢  
主奏獻爵執爵官以爵跪進于 皇帝之左 皇帝受  
爵獻于 高皇后神御前奏出主奏復位 各廟捧主  
官至此皆上香奠帛獻爵訖退奏跪贊讀祝樂暫止  
皇帝 皇后及 妃皆跪讀祝官取祝跪讀訖樂復作

奏俯伏興平身樂止典儀唱行亞獻禮樂作司贊女官  
奏搢圭 皇后搢圭奏獻爵執爵女官以爵跪進于  
皇后之右 皇后受爵獻于 太祖神御前奏出圭奏  
搢圭 皇后搢圭奏獻爵執爵女官以爵跪進于 皇  
后之左 皇后受爵獻于 高皇后神御前奏出圭奏  
復位 各廟捧 主官俱獻爵訖樂止典儀唱行終獻  
禮樂作司贊女官啓搢圭 宸妃等妃俱搢圭啓獻爵  
儀同亞獻但一妃獻 帝主前訖樂止太常卿進立于  
東西向唱賜福胙光祿官捧受如常儀內贊奏跪搢圭  
皇帝跪搢圭奏飲福酒 皇帝飲訖奏受胙 皇帝  
受訖奏出圭如常儀奏四拜 皇帝 皇后及 妃皆

四拜訖典儀唱徹饌樂作徹訖樂止太常卿跪奏禮畢  
請還 宮樂作內贊奏四拜 皇帝 皇后及 妃皆  
四拜樂止退立于東典儀唱讀祝官捧祝進帛官捧帛  
各詣燎位 各廟捧 主官捧回退 皇帝奉 太祖  
神主納櫃 皇后奉 高皇后神主納櫃訖導 駕官  
導 皇帝 皇后及 妃出各陞輿至 世廟行禮畢  
由來路至陞輅陸車處教坊司官跪奏樂奏敬 祖宗  
之曲大樂鼓吹振作還 官解嚴

穆宗隆慶元年增定命婦上箋儀 諸儀與永樂年同頒  
詔百官上表以第四日頒 詔之次日命婦行見  
中宮禮 前期一日女官陳設 皇后寶座于 宮中

設香案于丹墀之南其日清晨內官陳設儀仗于丹陛之東西及丹墀東西女官擎執者立于寶座之左右陳內樂于丹陛東西北向設而不作設箋案于殿東門外設班首拜位及各命婦拜位于丹墀北向設司贊位于丹墀東西設司賓位于命婦班之北東西相向設內贊二人于殿內東西命婦至宮門外司贊引命婦入就拜位女官具服侍班如常儀尚冠尚衣等官詣內奉迎儀導從如常儀陞座司贊贊四拜外贊唱進箋贊衆命婦跪引箋案女官一人由殿東門入至殿中箋文不宣命婦皆興司贊唱四拜尚儀跪奏禮畢皇

后興還 官命婦以次出

皇子誕生儀

世宗嘉靖十五年定 皇子初生三日 上親詣 南郊

奏告同日祭告 奉先殿 崇先殿遣官分告 南北

郊朝日夕月大社稷 帝社稷 天神 地祇行事俱

祭服具告文行三獻禮祭品用酒果脯醢 南北郊加

太牢文官五品以上武官四品以上俱隨文官三品以

上武官公侯伯 皇親駙馬仍詣 內殿各具服陪拜

次日 上御奉天門文武百官具吉服賀先後行四拜

禮仍自誕生之日爲始各吉服十日擇日頒 詔天下

如常儀分遣翰林院春坊六科官齋捧 御書往各

王府報知

今上萬曆十年更定 皇子初生三日遣官祭告 南北

郊 太廟 社稷壇是日 上具衮冕服 御皇極殿

文武百官及天下諸司進表官員各具朝服鴻臚寺官

致詞稱賀餘如常儀仍遣官齋捧 詔書往 諭朝鮮

國王

皇子 命名儀

世宗嘉靖十二年定 皇子生三月禮部行令欽天監擇

命名并行禮吉時翰林院備查 欽賜過 宗室名

同字行者進呈 御覽以避重複開擬數字上請簡定

前期 上擇內夫人之敬慎者以奉 皇子剪髮前一

日 上詣 太廟 世廟以 命皇子名告於 列聖

皇考用香帛脯醢果酒祝文至日早保姆抱 皇子

於寢宮剪髮為髻簪簪角如禮 上具皮弁服 御乾清

宮陞 御座 皇后率 嬪之生 皇子者各具其服

朝見行四拜禮畢 皇后侍立東面 嬪後保姆抱

皇子出自寢由西至 殿內授 皇子於 皇后內贊

奏曰 皇后率其嬪其氏敢用吉日祇見 皇子 上

降座 命以 制辭遂執 皇子之右手而 賜之名

皇后啟對畢遂左還授 皇子於保姆還寢 皇后

復率 嬪四拜畢各還 宮次日 上御奉天門 欽

降 手勅以 皇子睿名傳 諭禮部行宗人府上籍

玉牒

穆宗隆慶二年更定 皇子生彌月前髮如常儀候至百日禮部行令 欽天監擇 命名并行禮吉時翰林院預擬睿名上請 簡定至期 上以命 皇子名告聞於 奏先殿 世宗皇帝几筵 弘孝殿 神霄殿用告文祭品如常儀是日 上具常服 御乾清宮陞座 皇后率 皇貴妃各服其服朝見行四拜禮畢 皇西至 殿內授 皇子於貴妃內贊奏曰 皇貴妃某氏敢用吉日祇見 皇子 上降座撫 皇子首咳而賜之名 皇貴妃承 旨畢左還授 皇子於侍姆還

寢 皇后復率 皇貴妃四拜畢各還 宮次日 上

御皇極門降 手勅如常儀

皇女誕生 命名儀

世宗嘉靖十五年定 皇第一女生三日 上具常服告

聞於 奉先殿 崇先殿用香帛脯醢果酒百官皆吉

服 又十五年定 皇女生彌月前期 上擇內夫人

之敬慎者以奉 皇女剪髮是日早保姆抱 皇女於

寢宮剪髮為髻留羈如禮 上具常服 御乾清宮陞

御座 皇后率 妃之生 皇女者具服朝見行四

拜禮畢 皇后侍立東面 妃後保姆抱 皇女出自

寢由西至 殿內授 皇女於 皇后內贊奏曰 皇

后率 妃某氏祇見 皇女 上降座執 皇女之右手而 賜之名 皇后承 旨遂左還授 皇女於保姆還寢 皇后復率 妃四拜畢各還 官是日 官中舉宴禮如常儀

冊立 親王儀

太祖洪武三年定前期擇日奏告 太廟至日設 寶冊案五座于殿中 寶冊亭十座于 丹陛上之東時初封 秦晉等十王故設十座 皇太子侍立位于 御座之東 諸王拜位于 丹陛上及 御座前俱北面其侍衛執事俱與冊 東宮儀同是日早文武百官朝服侍班鼓三嚴 皇帝於 謹身殿具衮服 皇太子

於 奉天門具冕服 親王各具九章冕服 皇帝出

御奉天殿尚寶卿捧

寶引進四人引

親王俱由

奉天門東入陛自東陛 皇太子由 殿東入詣侍

立位 親王入至 丹墀拜位捧 冊寶內使由西陛

陛俱入就 丹陛立位 諸王鞠躬再拜承 制官跪

承 制由 殿中門出立于中門外稱有 制 親王

皆跪宣 制云封 皇子某為某王 某為某王 皇從

孫某為某王畢 諸王俯伏興鞠躬再拜興入受 冊

寶 秦王由 殿東門入詣 御座前拜位跪捧 冊

寶官於案前跪捧 冊授讀 冊官讀訖以授丞相丞

相以 冊跪授 秦王捧 冊內使跪於王西授 冊

興立於王西授 寶儀亦如之捧 寶內使興立於捧  
冊內使之下 秦王出內使捧 冊寶前導出至  
殿東門 王復位內使以 冊寶置 冊寶亭盞匣中  
以次 諸王入 殿授 冊寶如 秦王儀畢 秦王  
以下皆鞠躬四拜內使奉 冊寶亭前行 諸王由東  
階降奉 冊迎出 奉天門東是日所司備儀仗鼓吹  
導各 冊寶亭至各 親王殿各以序奉安于 殿內  
時 齊 潭 趙 魯四王年幼不克自承 制遣丞  
相等賚 冊寶授之丞相立 殿西跪承 制讀 冊  
寶 官奉 四王冊寶由中門出內使舉 冊寶亭至  
丹陛中以 冊寶置盞匣中讀 冊寶官遂由西門入

殿復位執事舉 冊寶前行丞相隨之由中陛授  
冊寶內使四人由西陛降遂同循 丹陛轉 謹身殿  
之東進詣 王宮門外駐焉內使監官出迎於 冊寶  
亭西南跪東北向丞相東北立西南向稱有 制遂宣  
制曰封 皇子某爲某王某爲某王畢內使監官迎  
入 宮中是日內使監官即 內殿正中陳香案設保  
姆抱 王受 冊位于香案之南授 冊寶內使監官  
位于東捧受 冊內使位于受冊位之西捧受 寶內  
使位于捧受 冊之南及 冊寶亭入 宮中遂置香  
案北保姆抱 王由東門入立受 冊位北面內使監  
官前立稱有 制保姆抱 王跪內使監官宣 制曰

今封皇子某為某王某為某王畢保姆抱王與前  
立授冊寶監官詣案取冊授保姆保姆受之以  
授于捧冊內使內使跪保姆左受冊與退立於西  
授寶如其儀以次諸王皆如之禮畢保姆抱王  
退以冊寶置亭中丞相遂復命奏云宣制訖又  
靖江王太祖姪孫冊寶儀並如秦晉等儀諸禮畢禮部  
尚書奏詔書用寶詣案捧詔書尚寶卿用寶  
訖禮部尚書捧赴午門開讀頒行天下侍儀奏畢  
駕輿還宮皇太子亦出

諸王婚見主親禮

世宗嘉靖三十一年二月裕王景王婚按故事先令

內臣將禮物至妃家王與妃儀仗道從以行既至妃  
父母出迎王立于堂東西向妃父母立于堂西東向  
王于妃父母前行四拜禮妃父母立受二拜禮畢  
王中坐餘親見王四拜王坐受妃拜父母四拜父  
母正坐受餘親叙家人禮

諸王行慶賀禮并授封出城

凡親王世子郡王遇東宮冊立具冕服其未  
冕者便服入見于文華殿鞠躬四拜跪鴻臚寺官一  
入詣殿門外正中跪致詞曰某王某等茲遇皇  
太子殿下榮膺冊命禮當慶賀致詞畢又俯伏興四  
拜是日皇太子詣武英殿見諸叔行家人禮四拜

諸叔西向坐受見諸兄行家人禮二拜諸兄西向立受  
或曰此洪武十二年詔  
禮官會議所定也

太祖洪武丙子秋八月 詔更議 諸王見 東宮禮先

是凡 親王來朝具冕服見 天子畢次見 東宮引

禮官導 王由 西華門東入至 文華殿前西向立

東宮具冕服執大圭詹事府官六員導出 陞座

東宮官左右侍從引禮官引 王就拜位行四拜禮

東宮坐受畢 東宮與 王俱常服至 後殿序家人

禮至是 皇太孫正位 東宮禮官議奏 諸王來朝

冕服見 天子畢次見 東宮已有定議其序家人禮

王及 東宮俱常服引禮官請 王由文華殿東門

入至 後殿 王西向坐 東宮東向坐贊禮官贊四

拜 王坐受相見禮畢叙坐則 東宮正中南向 諸

王列于東西時 諸王皆 東宮叔父乃復有是議

成祖末樂丙申冬十一月 周王肅 楚王貞來朝例次

日謁 孝陵 上命 皇太子 皇太孫及 小皇孫

陪謁因 命翰林臣楊榮金幼孜楊士奇至問曰謁

陵展敬之位如何士奇進曰 二王尊屬也 皇太子

太孫嫡宗也 二王當列稍前兩傍 太子當 二

王之後居中 太孫又於 太子之後亦居中 諸王

孫班在 太孫之後分二行 上曰爾言有據乎對曰

此非臣之臆見也宋儒朱熹家禮大約如此時 成祖

已自定位次試三人再詳遂出儀注于袖中與士奇合遣鴻臚寺丞周昇赴陵俾率行之

孝宗弘治四年定親王庶子授封其母始封夫人十年定

宗室舊制郡王出府止封一妃鎮國將軍

輔國將軍各止封一夫人奉國將軍止封一淑人

鎮國中尉止封一恭人輔國中尉止封一宜人奉

國中尉止封一安人妾媵不封

王府褒戒事例

英宗正統元年春正月丁卯朔始赴禮部行朝賀禮先

是弘治十八年冬十二月河南魯府奏鎮國將軍陽

銖陽鑿孝行可欲自備工料各建坊門乞賜坊名

許之王府以孝行遇旌自此始已而親郡王將軍

妃與夫人援例陳情不已

世宗嘉靖甲申大同軍人叛迫脅代懿王潛身出走宣

府朝廷遣光祿卿蕭淮奉勅諭慰癸巳十月六日

又叛邀代王克翟說稱與他做主王同奉御吳聰

襲衣小帽從北門出走金谷莊抵順聖川西城遂入宣

府鎮居焉王欲走京師都御史韓邦奇以聞禮臣議

曰王因變亂方萌復能引避杜絕嫌微其歸闕之

誠固可嘉尚而遁身迫切之情尤宜矜體宜免其來朝

差官安慰從之遂令翰林院撰書與王遣行人某往

慰撫之十一年秋九月禮臣夏言上疏云朝廷于

民庶之家凡節孝等行賜之旌表所以表其宅里以致特異于齊民之意至于天下王府則皆朱垣戟戶有不俟於旌表而後異者况朝廷降勅獎勵蓋以親親之懿特形天語之褒非宗室孰克當此故累朝以來宗藩善行止是寫勅獎勵不立坊牌所以崇重宗室辨別貴賤立法最有意義且天潢之裔孰非懿德若使有所表異分別既殊則淑慝互見亦非敦睦大同之道也今後各王府如有節孝等事及卓異行跡俱照舊例請勅獎諭不許奏請坊牌則體統正而風教同矣從之著爲令

今上萬曆十九年八月禮部覆潞王奏遇萬壽聖節

出城往寺觀祈禱原無此例奉旨朕弟奏欲出城祈

禱既查無舊例只依會典行二十六年十一月禮科

楊應文奏宗室越關漸不可長待旨潞王誤被

小人引誘出城私遊朕念天倫同氣恐其虧體辱親

所以奏聞聖母諭旨訓戒俾令悔悟自新其秦

藩中慰懷塚乃係伸訴冤苦來京奏辯貪酷縣官非同

別事若是別項妄奏必依越關奏擾之條楊應文這厮

狂逞私臆比方親藩抗旨竇奏本當重處姑且四

俸一年再有故違的重治不饒

親王出講儀

萬曆三十年正月禮部尚書馮琦等奏二十九年

十二月二十九日內閣大學士沈一貫揭請 福王婚禮奉 旨朕覽卿奏具見忠愛婚禮候 旨行 福王且看出閣講學擇日具儀來行除擇日行欽天監 題請講讀等官行吏部查照 親王講讀處所酌量修造合用書籍器具行 內府各衙門辦用外所用一切合行儀注 臣照會與稍為泰酌謹開坐上請 福王殿下出閣先期一日內侍官設坐于書堂正中坐西面東設書案于坐之左側置書于案設寫字案于坐之右側置筆硯做紙于案是日早輔臣率領講讀侍書于堂門外稍南面北拱立伺候 福王殿下入于書堂內坐定 令旨說先生每來輔臣率各官進入行四拜禮分

班侍立內侍官舉書案就左立講讀官以次進立案前授書各十遍訖講讀官進講講畢 令旨說先生每吃酒飯內侍官各應各官出 殿下暫入書堂南間少憩 輔臣再率各官入侍 殿下寫字候 殿下出坐定 令旨說先生每來輔臣同各官入照前分班侍立內侍官舉寫字案于座前侍書官進至案前看寫字寫畢各官行一拜禮出仍于書堂外向北立候 殿下進內各退輔臣看所寫字照例圈註于旁以備勸益 一次日以後每日早 福王殿下出書堂各官進見行一拜禮其授書講書寫字並如前儀輔臣止侍看三日三日之後講讀侍書官皆知規矩已定徑自如儀授書講書看

字輔臣不須至寫字畢每日輪一內侍官捧做紙送內閣圈註一福王殿不每日所讀書四書一本書經

一本授書務要字樣真正講書直說大意務要通曉先

一日進講章三日一溫書就溫講所進講章寫字先用

影本以後寫熟對帖自寫一各官酒飯止是初入書

堂時令旨說一次以後不必再說只于講書罷令

旨與先生每茶吃內侍官答應歲率為常一每歲假

日聖節前後通九日千秋節一日正旦初一日至

二十日花朝一日清明一日端午前後通三日七夕一

日中秋一日重陽先後通三日冬至前後通五日蜡八

日除夕前五日每月朔望各一日遇風雨暫免遇大寒

大暑該歇時請旨定奪一講讀侍書官俱光祿寺

給與酒飯一先期一日各該內外執事官俱赴書堂

演禮一每春講定以二月初旬起至五月初旬暫止

秋講定以八月初旬起十月終止一輟講之後內侍

書官照舊啓請尋溫舊書及舊寫字送閱圈註講讀

等官遵照先年事例半月恭詣書堂請誦書習講或

別授新書等項以效忠益

### 宗室婚儀

今上萬曆十年議准宗室子女年十五以上奏行本境

內官員軍民之家及居官入籍年久者選擇婚配務要

家道清白年歲相應雖係重結王親亦必服屬無礙

方許題請授封成婚如有遠方流移軍匠并父祖過犯  
及本府軍校厨役子女朦朧冒選者革退另選如已經  
授封成婚者夫淑恭宜人等革去封號所生子女照擅  
婚例止許請名不許請封郡縣主君等儀賓革去職事  
各該保勘員役及主婚媒証人等依律治罪如有營求  
撥置情由及本府軍校厨役與王府爲婚者俱問發  
邊衛永遠充軍萬曆七年例其初選婚之日長史教授等官  
取具媒証人等甘結重加保勘申呈巡按御史轉行布  
政司覆勘無礙照依類奏事例於每季仲月具奏一次  
先期巡按御史行長史教授等官啓王具本齊發其  
布政司文結免其復具止用長史教授等官粘連媒証

人等甘結繳部若王奏已到而巡按奏未到按季咨  
都察院行催如巡按奏先到一面查題遲至半年以外  
而王奏與長史教授等結未到者每上下半年同名  
封類叅一面行巡按御史將輔導等官提問坐以抑勒  
之罪

凡妾媵限制萬曆十年議准凡親王妾媵許奏選一  
次多者止於十人世子及郡王額妾四人長子及  
將軍額妾三人中尉額妾二人弘治間例世子郡王選  
婚之後年二十五歲嫡配無出具啓親王轉奏長史  
司仍申呈巡按御史覈實具奏於良家女內選娶二人  
以後不拘嫡庶如生有子則止於二妾至于三十歲復

無出方許仍前具奏選足四妾長子及將軍中尉選婚  
之後年三十歲嫡配無出照例具奏選娶一人以後不  
拘嫡庶如生有子則止於一妾至三十五歲復無出方  
許仍前具奏長子將軍娶足三妾中尉娶足二妾至于  
庶人必年四十以上無子方許奏選一妾嘉靖三十九年例  
選妾禁例悉如選婚不許濫選流移過犯及本府軍校  
厨役之家各 王府每年備將妾媵姓氏來歷并入府  
年月攢造文冊送部其子女生年月日并名位行次即  
填註本妾項下以備名封查考但有不遵明例或年未  
及而預陳或已生子而復娶將本宗參奏罰治所生子  
女中尉以上照濫妾例行庶人不給名糧

凡庶人婚嫁

萬曆七年議准各

王府庶男婚資照

庶女例一槩免給

凡擅婚子女

萬曆七年議准凡查出擅婚照例分別

成婚在嘉靖二十八年以前者所生子女已封者免革  
未封者查無別礙姑准請封成婚在二十八年以後者  
所生子女仍照例止許請名不許請封其已封者姑准  
半祿終身日後子孫一體止給名糧 十年議准 宗

室奏選正配選有之日仍奏請封號候有 成命方許

成婚若成婚在未封之先者謂之擅婚所生之子止許

請名不許請封年足十五歲以上歲給口糧五十石本

折中半兼支其女任其擇配俱不給婚嫁之資

嘉靖二十八年

例若不經奏選不請封號私自成婚者比之擅婚違礙尤甚所生子女比照濫妾例行如有聰繼王爵係擅婚私婚之子有礙請封者臨期請旨定奪

凡濫妾子女萬曆十年議准宗室孀生子女必其

毋妾係額內應娶人數曾經奏選明白者方准請名請封如不經奏選或增立陪從官人名目或入府在正配未封之先皆為濫妾查係額內人數所生之子姑准請名歲給本色米十二石若在額外者不給其女任其擇配俱不給婚嫁之資如有聰繼王爵係濫妾之子有礙請封者臨期請旨定奪

凡花生子女有女收樂女

與不良之婦為婚者所生子女并選配夫人等及儀賓已授封者爵職封號祿米盡行革去未授名封者不許朦朧冒請新生者不許造入玉牒以混天潢其女

婦盡數逐出樂工人等俱問發邊衛未遠充軍本宗仍聽參奏降革輔導官及保勘員役一體治罪正德四年

凡請封妃父萬曆十年議准親郡王選有婚配奏

請授封為妃即將妃父授五城兵馬職銜親王妃父

授兵馬指揮世子及郡王妃父授兵馬副指揮移

咨吏部銓注衙門繼妃之父亦照例請授其次妃及追

封王妃之父俱不許濫請如妃父原有官職可稱及

世子郡王妃進封為親王妃其父已有職銜者不

必再請 洪武間例

凡儀賓婚配 萬曆七年議准 親郡王儀賓例給祭

典外其餘悉從裁革凡主君夫亡而乏子嗣可依者照

舊贍給若有子嗣夫亡及儀賓于主君亡日即住支常

俸不許虛冒 十年議准 親郡王及將軍之女選中

儀賓俱免赴京謝 恩選有之日長史教授等官申呈

撫按衙門詳允就便冠帶成婚各於年終具本類奏 萬曆

七年如所選儀賓有未成婚而病故者許另選婚配 嘉靖

四十四其儀賓成婚之後各 王府照例請給 誥命

祿米從人該布政司仍具結到部以憑題覆奏請期限

照男選婚女請封例如過期十年以下查題十五年以

下行勘十五年以上立案

凡 親王入朝宣德初止 漢趙二邸入臨 大行以

後 親王無入朝者惟 襄憲王為 英宗叔父遣金

符之嫌賴 上仁明不為動而 王於景泰中疏奏

皇太后問 上起居及勸 景皇帝朝 上於南城俱

留中 上見之大感悅特許入朝 陛見後躬至 內

殿行家人禮 宴賚加渥親送至 大明門而別再朝

復如之為峴山漢水賦寓恩特置一護衛衛 王護衛

時不置又矣又 詔王春秋高歲時得游觀田獵不為

例今所存 御書婉敬剴篤雖漢肅之於東平不能擬

其萬一也 姪 御名 奉書叔父襄王承諭具悉尊意所

以惡景諱之僭分而喜姪之復位及曩有陳言慰安章  
 初未嘗達 皇太后所蓋為景諱之所蔽匿也今已於景諱  
 宮檢而得之姪親覽之再三深見叔父忠愛之誠發於  
 讜論抑邪扶正防微杜漸無非為 宗廟社稷計惟叔  
 父之心即周公之心也叔父二章亦即金縢之書之比  
 也 皇太后聞之感嘆不已承昇祥雲捧日玉帶謹以  
 領訖叔父云欲親行朝覲本不敢煩遠來第念 先帝  
 同氣至親惟叔父 宗室至賢亦惟叔父于情于誼不  
 可不重得一見以篤親親今遣太監夏時齋奉 勅符  
 及書迎請即時氣候清和叔父宜從容就道宮眷世子  
 郡王宜留藩邸其當從行之人亦隨尊意帶來竚俟其  
 至惟叔父亮之

凡諸王出省 洪武甲寅 命 韓王公 潘王莫往

省 秦王 晉王 燕王 周王 齊王 上以本二

王年幼欲其遊觀 諸王國都以敦友悌之情故有是  
 命 二王之行從官各十一人翰林編修 王府紀

善各一員掌侍從講說經史撰寫文字禮部郎中一員  
 掌祭祀所過名山大川及祀典神祇序班二員掌贊相

禮儀良醫二員掌調治藥餌典膳二員掌王飲饌百戶  
 二員率校尉二百人扈從 二王同日啓行至宿州分

道 韓王由周歷秦晉抵燕齊 潘王自齊歷燕晉抵  
 秦州皆至秋八月而還

九王相國遣賀 嘉靖乙丑春始禁之先是 弘治十  
二年秋 德王奏臣初之國 魯王遣典寶正張貴前  
來看賀今 王之國臣欲差官前去行禮 朝廷不從  
十五年春 鄭王奏稱 汝王分封到府與臣地界  
相連欲行遣官看賀亦查無事例罷之及是御史林潤  
以爲言下禮部議尚書李春芳等云春秋之義人臣無  
私交况列藩分封壤地相隔若彼此交驩禮幣紛雜則  
將來之誣上行私尤有可慮者 制曰可遂著爲令  
凡番國朝貢儀 洪武初四夷朝貢東有朝鮮日本南  
有暹羅琉球占城真臘安南瓜哇西洋瑣里三佛齊渤  
泥百花覽邦彭亨淡巴須文達那凡十七國其西南夷

隸四川者軍民府凡六烏蒙烏撒芒部邛部普安東川  
安撫司一曰金筑宣撫司一曰酉陽宣慰司三曰貴州  
播州石柱招討司三曰天全六番長河土酋長官司凡  
三十廬山募役西堡大華寧國寨頂管十二營平茶程  
番康佐木瓜方番昔亦簇占麓先結簇格匝簇北定簇  
祁命簇阿昔洞簇勤都簇班班簇者多簇來匝簇泥溪  
雷坡沐川平夷蠻夷岳希蓬隴木頭靜川府四德昌馬  
湖建昌舍州州十九安順龍永寧鎮寧建安禮栢與黎  
里澗武安永昌隆姜黎溪會理威龍昌普濟衛一曰建  
昌縣三中碧舍麻龍 其隸廣西者府三田州思明鎮  
安州三十五龍英江龍養利上下凍思陵萬承安平太

平都結思城結倫鎮遠左茗盈南丹結安思同東蘭那地全茗利泗城奉義縣四陀陵羅陽崇善永康隸雲南若軍民府一曰姚安府八元江麗江景東楚雄鶴慶尋甸大理臨安宣慰使司三平緬車里八百州二姚鄧土官三海東寶居小雲南縣二廣通習裁隸廣東者宣慰使司四施南永順保靖安撫司一忠建長官司三臻部六洞黃波等處軍民府一曲靖西城之部七西天泥八刺國朶甘沙州烏思藏撒立畏兀兒撒來撒馬兒罕上以舊儀頗煩故復命更定之凡番國王來朝先遣禮部官勞于會同館明日各服其國服如嘗賜朝服者則服朝服於奉天殿朝凡行八拜禮畢即詣文

華殿朝皇太子行四拜禮見親王亦如之親王

立受後各二拜其從官隨番王班後行禮凡遇宴會番王班次居侯伯之下其番國使臣及土官朝貢皆如常期洪武己酉番王至京師令本部官於會同館禮待

永樂以後四夷來朝貢者本部奏待宴官員欽命

內官與文武大臣或學士大臣等官不拘員數成化

初又以武職大臣待北虜東夷西番朝鮮日本等處并土官設宴俱於會同館惟北虜宴於禮部俱從禮部奏請點用云凡四夷歸化人員及朝貢使客初至會同

館禮部主客司即為點視正從定其高下房舍舖陳一切處分安妥仍撫綬之精膳司照例支送酒肉茶麵飲

食之物每五日一次又量其來人重輕合與茶飯者即  
爲造辦食品卓數主客司官一員或主席或分左右隨  
其高下叙坐以禮管待仍令教坊司供應 是年西域  
入貢表中稱王者七十五人貢使二百九十人禮部尚  
書夏言請國稱一人王大學士張孚敬曰西域稱王者  
多恐彼自封授或部落相稱先年入貢稱王亦有三四  
十人者答 勅並稱王今書裁奪恐夷情觖望有 旨  
禮部與大臣議夏言又云西域諸國稱王者惟土魯番  
天方撒馬兒罕三國如日落諸國名甚多朝貢絕少且  
與土魯番諸國不相統弘治正德間土魯番十三人貢  
天方正德間四人貢稱王者率一人或二三人餘稱頭

目親屬嘉靖二年八年稱王者天方至六七人土魯番  
至十二三人此兩年間撒馬兒罕至二十七人內閣言  
先年亦有稱王至三四十人者并數三國耳乃令土魯  
番十五王天方二十七王撒馬兒罕五十三王併數則  
百五六十王前此所未有况所稱王號原非舊文即有  
同者地面又異弘治時回 勅書國稱一王若循撒馬  
兒罕往年故事類答王號人與一 勅恐非所以尊中  
國而嚴外夷也自後各執賜 勅率其部落貢不如期  
使不如數任意往來勢難阻絕驛傳勞煩宴 賜頻數  
竭我財力以役遠夷計亦左矣 上從之蓋夏公之議  
慮深遠而得大體云 隆慶元年秋朝鮮國遣刑曹參

判李榮賢吏曹叅判洪春年等入朝 詔延宴尋罷之  
 時榮賢等聞朝鮮國王薨逝奏不恐赴宴遂有是 詔  
 凡番國有朝貢通于中國者中國每以 詔書及之使  
 臣賚 詔既入番境即遣人先報番王番王遣官迎于  
 境上前期既得報即令有司於國門外公館供具綵幄  
 設 龍亭于正中南向亭之前置香案仍預備金鼓儀  
 仗樂器等伺迎及 詔書迎入國內凡街巷俱掛綵其  
 王宮內設開亭設香案於殿之正中南向設使臣立位  
 于香案之東設開讀案位于殿陛之東北設番王拜位  
 于殿中及衆官拜位于殿下之南異位重行俱北向設  
 捧 詔官位于開讀案之北宜 詔官位于捧 詔官

之南展 詔官二人又位于宜 詔官之南俱西向司  
 禮二人位于番王拜位之北引禮二人位于司禮之南  
 引班四人位于衆官拜位之北俱東西相向至日遠接  
 官啓 詔書出館至國門金鼓先導其耆老人等次之  
 衆官俱朝服又次之番王冕服行龍亭之先使臣常服  
 隨龍亭之後近至宮中金鼓分列于門外之左右耆老  
 分列于庭中之東西其 龍亭置殿上正中南向使臣  
 等各就位引禮生引王就拜位引班引衆官各就拜位  
 由是司贊者唱鞠躬樂作四拜平身樂止使臣向前請  
 南向稱曰有 制司贊者唱曰跪番王與衆官皆跪又  
 唱曰開讀由是宣讀者及展讀官詣位使臣詣 龍亭

捧詔書授捧詔官捧詔官詣前受詔跪受訖  
即授展讀官遂展開讀訖捧詔官仍于宣詔案捧  
詔授使臣仍置龍亭中司贊官唱俯伏興鞠躬樂  
作四拜平身樂止唱搢笏鞠躬三舞蹈山呼萬歲第二  
呼仍前第三呼萬萬歲贊出笏俯伏興樂作四拜平身  
樂止禮畢引禮引番王退引班引衆官以次退釋服使  
臣以詔書付所司班行番王使者分賓主行兩拜禮  
使臣居東番王居西如番王陪臣行禮使臣立受嘉  
靖壬辰給事中陳侃行人高澄奉勅往琉球封其國  
主尚清爲王侃等因言弘治正德間使安南者安南乞  
鑿詔勅爲鎮國之寶時使臣爲請得鑿即琉球請鑿  
如安南海外遠不得即請乞下禮官議議請如安南許  
之比侃等至國受封畢王拜曰天朝詔勅歲金匱  
者八乘於茲矣請留得遂如其請云

續文獻通考卷之一百二十三

皇明進士雲間王圻纂輯

王禮考 巡狩

宋

寧宗嘉定七年 四月幸太乙宮明慶寺禱雨

理宗景定四年車駕幸太乙宮赴座官賜醴簪花時太學生劉黻上疏諫游幸其畧曰天下有道人主以憂勤而忘逸樂天下無道人主以逸樂而忘憂勤自昔國家人安四夷賓服享國日久侈心漸生若漢武帝之單于震讐言而有千門萬戶之觀唐明皇之北邊無事而有驪山溫泉之幸至於隋之煬帝陳之後主危亡日迫遊觀無

度不足效也堯舜禹湯文武之兢業祇懼終始憂勤無  
逸言遊畋則不敢日昃則不暇食曷嘗借祈禳之詭以  
事遊觀之適比年以來以幸爲利以玩爲常未免有輕  
視世故眇忽天下之心單于未嘗震讐而有武帝多欲  
之費耗北邊未嘗無事而有明皇宴安之鳩毒陛下春  
秋尚壯貽謀垂憲之機悉在陛下作而不法後嗣何觀  
自十數年間創龍翔創集慶創西太乙而又示之以遊  
幸導之以禱祠蠱之以虛誕不經之說孔子曰少成若  
天性習慣如自然積久慣熟牢不可破誰得而止之且  
而太乙之役佞者進曰太乙所臨分野則爲福近歲自  
吳移蜀信如祈禳之說西北坤維安堵可也今五六十

州安全者不能十數敗降者相繼福何在耶武帝祠太  
乙於長安至晚年以虛耗受禍而後悔方士之謬雖其  
悔之弗早猶愈於終不知悔者也大凡人主不能無過  
脫有過言過行宰執侍從當言之給舍臺諫當言之縉  
紳士大夫當言之皆所以致君於當道者也今陛下未  
爲不知道未爲不受人言宰執以下希寵而不言言之  
而不力皆非所以愛陛下也

遼太祖匹馬一麾斥地萬里經營四方未嘗寧居太宗兼  
制中國秦皇漢武儀文日至後嗣因之旄頭豹尾驅五  
京之間終歲勤動轍迹相尋民勞財匱神冊三年幸  
遼陽故城七年次昭烏山省風俗見高年議論朝政定

吉凶儀

太宗天顯元年正月幸渤海復幸忽汗城閱府庫物賜從  
臣有差 十年十一月幸弘福寺見觀音畫像乃大聖  
皇帝應天皇后及人皇王所施顧左右曰昔與父母兄  
弟同聚觀于此時月未幾今我獨來悲嘆不已 會同  
三年三月詔扈從擾民者從軍律

穆宗應曆十三年二月如黃河觀群臣射賜物 十六年  
七月諭有司凡行幸之所必高立幟幟令民勿犯違者  
以死論

聖宗統和四年四月次南京以夷離畢姑里右部送輜重  
於行宮暑行日五十里人馬疲乏遣使讓之 七年正

月幸易州御五花樓撫諭士庶 十年正月如臺湖以

臺湖爲望幸里 十二年三月如長春宮觀牡丹 二

十一年九月幸女河湯泉改其名曰松林 開泰四年

十二月南巡海徼 太平三年五月清暑緬山賜名曰

永安 四年正月如鴨子河二月改鴨子河曰混同江

撻魯河曰長春河 五年幸南京民以年穀豐盈車駕

臨幸爭以土物獻上禮高年恤鰥寡賜酺飲至夕六階

燈火如晝士庶嬉遊上喜亦微行觀之

興宗重熙五年四月幸后弟蕭無曲第曲水泛觴賦詩

五月幸北院大王高十行帳拜奧賜銀絹 七年二月

駐蹕東川幸五方閣鷹鷂 十五年七月如秋山禁扈

從踐民田 二十三年十月駐蹕中京幸新建秘書監  
道宗大康三年二月以中京饑罷巡幸 五年九月禁扈  
從擾民 大安二年九月還自上京出太祖太宗所御  
鎧仗示燕國王延禧諭以創業征伐之艱

天祚帝保大二年正月為金人所逼幸雲中遺傳國璽  
遼帝秋冬避寒春夏避暑隨水草就畋漁歲以為常四時  
各有行在之所謂之捺鉢 春捺鉢曰鴨子河灤 夏  
捺鉢無常所多在兔兒山 秋捺鉢曰伏虎林 冬捺  
鉢曰廣平淀

廣平淀皇帝牙帳以槍為硬寨用毛繩連繫每槍下黑  
氊傘一以庇衛士風雪槍外小氊帳一層每帳五人各  
執兵仗為禁衛南有省方殿殿北約二里曰壽寧殿皆  
木柱竹椽以氊為蓋綵繪龕柱錦為壁衣如緋繡額又  
以黃布繡龍為地障窓隔皆以氊為之付以黃油絹基  
高尺餘兩廂廊廡亦以氊蓋無門戶省方殿北有鹿皮  
帳帳次北有八方公用殿壽寧殿北有長壽帳衛以硬  
寨宮用國兵四千人每日輪番千人祇直禁衛外卓槍  
為寨夜則拔槍移卓御寢帳周圍拒馬外設舖傳鈴宿  
衛每歲四時周而復始焉 四時巡狩契丹大小內外  
臣僚并應役次人及漢人宣徽院所管有司皆從漢人  
樞密院中書省惟摘宰相一員樞密院副都丞旨二員  
令史十人中書令史一人御史臺大理寺選摘一人扈

從每歲以正月上旬車駕啓行宰相以下同于中京居  
守行遣漢人一切公事其餘拜官僚止行堂帖差候會  
議行在所取旨出給誥勅文官縣令錄事以下更不奏  
聞武官須奏聞不許擅除五月納涼行在所南北臣僚  
會議受宋及諸國禮貢十月坐冬行在所亦如之  
問聖體儀 車駕至捺鉢坐御帳臣僚公服問聖躬萬  
福贊再拜各祇候奏事宜徽以下常服教坊與臣僚同  
車駕還京儀 前期一日宣徽以下橫班諸司閣門並  
公服于宿帳祇候至日詰旦皇帝乘玉輅閣門宣諭軍  
民訖道駕侍相以下進至內門閣副勘箭畢通事舍人  
鞠躬奏臣宣放仗禮畢

勘箭儀 皇帝乘玉輅至內門北南臣僚于輅前對班  
立勘箭官執雌箭門中立東上閣門使詣車前諸雄箭  
在車左立勾勘箭官進勘箭官揖進至車約五步面車  
立閣使言受箭行勘勘箭官拜跪受箭舉手勘訖鞠躬  
奏內外勘同閣使言准勅行勘勘箭官平立退至門中  
舊位立當胄執箭贊軍將門仗官近前門仗官應聲開  
門舉聲兩邊齊出並列左右立勘箭官贊呈箭次贊內  
出喚仗御箭一隻准勅付左金吾杖行勘贊合不合應  
合合贊同不同應同同訖勘箭官再進依位立鞠  
躬自通全衙臣某對御勘箭同退門中立贊其箭謹付  
閣門使進入事畢其箭授閣使轉付宣徽

金太宗天會八年七月如東京温湯 十年七月如中京  
十月如與中府 十二月至自與中府 十二年正  
月如東京 四月至自東京

熙宗天眷元年二月如爻刺春水幸天開殿 二年三月

如天開殿 六月至自天開殿 三年四月如燕京

皇統二年二月如天開殿 四年十月如東京 九月

如東京 五年正月次濟州東水 九月至自東京

時諫議大夫程寀疏畧曰古者天子皆有巡狩無非事  
者或省察風俗或審理冤獄或問民疾苦以宣布德澤  
皆巡狩之名也國家肇興誠恐郡國新民逐末棄本習  
舊染之汚奢侈詐僞或有不明之獄僭濫之刑或力役

無時四民失業今鸞輿省方將憲古行事臣願天心洞  
照委之長貳釐正風俗或置旣匪以申冤枉或遣使郡  
國問民無告皆古巡狩之事昔漢昭帝問疾苦光武求  
民瘼如此則和氣通天下丕平可坐而致也疏奏上嘉  
納之

海陵貞元元年二月自中京如燕京 三月至自燕京始

備法駕 二年三月幸大興府 正隆六年正月命叅

知政事李通諭宋使徐度等曰朕昔年從梁王軍樂南

京風土常欲巡幸今營繕將畢功期以二月末先往河

南帝王巡狩自古有之以淮右多隙地暫欲校獵其間

從兵不踰百人况朕宗室陵廟在此安能入于彼乎汝

等歸告汝主令有司宣諭朕意使淮南庶民無懷疑懼  
三月次河南府幸汝州温湯視行宮地自中都至河  
南所過麥皆爲空復禁扈從毋輒離次及遊賞飲酒犯  
者死而莫有從者 六年四月次温湯戒扈從毋輒過  
汝水上

世宗大定元年十一月以如中都期日詔群臣又詔中都  
轉運使左淵曰凡宮殿張設無得增置無役一夫以擾  
百姓但謹圍禁嚴出入而已戊子辭謁太祖廟及貞懿  
皇后園陵已丑如中都 三年九月如大房山詔翰林  
待制劉仲海等庶問車駕所經州縣 四年正月如安  
州春水大雪詔扈從人舍民家者人支錢一百與其主

九月幸鷹房主者以鷹隼置內省堂上上怒曰此宰  
相廳事豈置鷹隼處耶痛責其人俾置他所 七年十  
月次保州上謂侍臣曰近聞朕所經郡邑增宴寢堂宇  
後皆避之此甚無謂可宣諭令仍舊居止 十二年五  
月如百花川諭宰臣曰朕每次舍凡秣馬之具皆假于  
民間多亡失不還其主此彈壓官不職可擇人代之所  
過即令詢問但亡失民間財物並償其直 十七年五  
月幸姚村淀閱七品以下官及宗室子諸局承應人射  
有差 十八年正月如春水 四月上謂宰臣曰朕巡  
狩所至必令體訪官吏臧否何如玉田主簿石抹杳乃  
能吏也可授爲本縣令 二十年正月幸石城縣行宮

以玉田縣行宮之地爲御林大淀樂爲長春淀 二十  
二年三月諭戶部今歲行幸山陵所須並不得取諸民  
間雖所用人民並僱以官錢違者杖八十罷職 二十  
四年十月幸東宮賜皇孫吾魯補洗兒錢 時世宗將  
幸上京大理司直路伯達上書諫曰人君以四海爲家  
豈獨舊邦是思空京師而事遠遊非慎重之道也書奏  
不報後薛王府掾梁襄上疏極諫言金蓮川在重山之  
北地積陰冷五穀不殖郡縣難建蓋自古極邊荒棄之  
壤也氣殊候異中夏降霜一日之間寒暑交至特與上  
京中都不同尤非聖躬將攝之所凡奉養之具無不遠  
勞飛輓越山踰險其費數倍至于垣舍之處車騎闕塞  
主客不分牛馬風逸以難收減獲逋逃而莫得奪攘蹂  
躪未易禁止公卿百官衛士富者車帳僅容貧者穴居  
露處輿臺皂隸不免困踣饑不得食寒不得衣一夫致  
疾染及衆人夭傷無辜何異刃殺此特細故耳更有大  
于此者臣聞高城浚池深居邃禁帝王之藩籬也壯士  
健馬堅甲利兵帝王之爪牙也今行宮之所無有高殿  
廣宇城池之固是廢其藩籬也掛甲常坐之馬日暴雨  
蝕臣知其必羸瘠矣禦侮待用之軍穴居野處冷啖寒  
眠臣知其必疲瘵矣衛官周廬纔容數人一旦霖潦積  
旬衣甲弓刀濡濕柔脆豈堪爲用是失其爪牙也神龍  
不可以失所人主不可以輕行雖陛下悅以使人勞而

不怨豈若不勞爲愈人君者不可恃人無異謀要在處  
已無憂患之地耳燕都地處雄要北倚山嶮南壓區夏  
若坐堂隍俯視庭宇本地所生人馬勇勁方遼雖小止  
以得燕故能控制南北坐致宋幣燕蓋京都之選首也  
況今又有宮闕井邑之繁嚴倉府武庫之充實百官僚  
屬皆處其內非曩日之陪京也居庸古北松亭榆林等  
關東西千里山峻相連近在都畿易于據守陛下舍此  
而他往倘有內隙乘之臣甚懼焉議者謂往年遼國之  
君春水秋山冬夏捺鉢舊人喜談之以爲真得快樂之  
趣陛下效之耳臣謂三代之政今有不可行者况遼之  
過舉哉且遼之基業根本在山北之臨潢其所遊不過  
臨潢之旁儀物殊簡輜重不多隔三五歲方一行非歲  
歲如此也本朝皇業根本在山南之燕豈可舍燕而之  
山北乎上京之人棟宇是居不便遷徙方今幅員萬里  
惟奉一君承平日久制度殊異文物增廣輜重浩穰隨  
駕生聚殆逾百萬如何歲歲而行以一身之樂歲使百  
萬之人困于役傷于財陛下其忍之歟世宗納之爲罷  
行

章宗明昌五年八月如杳沙秋山 六年十月以歲幸春  
水秋山五日一進啓居表自今可十日一進 承安四  
年六月次定興禁有司扈從蹂踐民田次中府勅令扈  
從軍所踐禾稼計直酬之 泰和二年五月諭有司曰

金井捺鉢不過二三日留朕之所止一涼厦足矣若加  
修治徒費人力其藩籬不急之處用圍幕可也 又勅  
御史臺京師拜廟及巡幸所過州縣止令洒掃不得以  
黃土覆道違者罪之

元

世祖甲統元年車駕駐昔兀之地命給官錢僱京橐駝運  
米萬石輸行在所 四年車駕幸開平 至元元年十  
月車駕幸上都 九月車駕至自上都 三年二月車  
駕至 九月車駕至自上都 是年詔上都路總  
管府遇車駕之巡幸行留守司事車駕還即復舊 四  
年二月車駕幸上都 是後九十七幸不悉書 十八

年春正月帝如嚙州二月如柳林三月朔還宮 二十  
五年三月大駕幸上都 丁酉駐蹕野狐嶺 七月駐  
蹕許泥牙之地 九月大駕駐野狐嶺 壬辰至大都  
三十一年成宗既即位巡狩三不刺之地董文用言  
先帝新棄天下陛下巡遊不以時無以慰安元元人君  
猶北辰居其所而衆星拱之不在勤遠畧也宜還京師  
上從之車駕還宮 是年九月聖誕節帝駐蹕三部落  
受百官朝賀時監察御史崔敬疏言太祖以上都爲  
清暑之地車駕行幸歲以爲常閣有大安殿有鴻禧睿  
思所以保養聖躬適起居之宜存畏敬之心也今失刺  
幹耳朶思乃先皇所以備宴遊非常時臨御之所陛下

元

時

受百官朝賀

時監察御史

崔敬疏言太祖以上都爲

方以孝治天下。屢降德音。祇行宗廟親祀之禮。雖動植無知。罔不歡悅。而國家多故。天道變更。臣備員風紀。以言爲職。願大駕還大內。居深宮。嚴宿衛。與宰臣謀治道。萬機之暇。則命經筵進講。究古今盛衰之由。緝熙聖學。乃宗廟之福也。

成宗元貞元年二月車駕幸上都。二年三月車駕幸上都。是年又幸五臺。大德三年車駕幸柳林。時每

歲或二月三月車駕幸上都。至九月或十月還大都。

武宗時每歲幸上都如成宗。至大四年時仁宗未改元車駕將

還大都。太后以秋稼方盛。勿令鷹坊等人隨往。庶免害稼。勅禁止之。

仁宗時每歲幸上都如武宗。

英宗至治二年三月帝如柳林。五月如五臺山。以吳全節爲玄教大宗師。時每歲幸上都如仁宗。

泰定帝泰定三年七月幸大軋元寺。時每歲幸上都如英宗。四年二月壬午狩于溲州。

文宗天曆元年幸大聖萬安寺。謁世祖裕宗神御殿。至

順元年五月車駕發大都。次大口。已巳次龍虎臺。六

月大駕至上都。閏七月大駕將還。勅上都兵馬司二

員率兵士由偏嶺至明安。巡邏以防盜賊。丁酉大駕

發上都。八月大駕至京師。是歲樞密院臣言每歲

大駕幸上都。發各衛軍士千五百人扈從。又發諸衛護

軍萬五千人以駐山後蒙古軍三千人駐官山以守關  
梁乞如舊數調遣以俟來年從之 二年車駕幸上都  
三年五月大駕發大都時巡於上都

順帝元統二年四月車駕時巡上都 九月車駕還自上  
都 順帝至元之世以二三月時巡上都至六月還大  
都 至正元年至十八年每歲以四月時巡上都八月  
還大都

### 皇明

太祖洪武元年八月 帝幸北京先是上得汴梁詔  
以金陵爲南京汴梁爲北京至是幸之十月戊寅還南  
京 八年四月 上幸中都次滁州遣官祭滁陽王

上駐中都祭告 天地 五年定出巡儀注 車駕出  
入有司肅清道路官民不許開門觀望行立所在官員  
父老合迎 駕者於仗外路右叩頭俯伏候 車駕前  
行方起若遇 駐驛之處合迎 駕之人行五拜禮

車駕行處有衝入仗內者絞仗外五十步內觀望者杖  
如於郊野外一時不能迴避者俯伏行立觀望者杖典  
仗衛官故縱者同罪失覺減二等陳訴冤抑仗外俯伏  
以聽如衝入仗內者如律合迎 車駕之人仗外不俯  
伏者亦如律 車駕所至凡文武官非近侍及宿衛護  
駕而在五十步內者依例俯伏行立觀望者如律

縱放牲畜突入仗內者杖 凡皇城宿衛及在京守門

官員軍士遇 駕出入執仗肅立不須迴避其在外城  
鎮守門官及士卒如遇 車駕經行則俯伏迴避

成祖永樂六年八月丙戌 詔明年二月巡北京 七年

正月 命學士胡廣諭德楊榮金幼孜修撰王英等扈

從 二月 上啓行 命皇太子監國 三月 車駕

至北京 御奉天殿受朝賀 八年十月丁酉 車駕

發北京 十一月癸亥朔冬至 車駕還京 十一年

十月 上巡幸北京 皇太孫從 十四年冬十月

上還南京 十五年三月壬子 上巡北京 皇太子

監國 命胡廣楊榮金幼孜扈從

六年改定巡狩儀注 一 詔諸司及鎮守官知會

一 禮部預行各處凡有重事并四夷來朝俱達 行在

所仍具本啓聞其餘事務奏啓俱達 京師啓聞施行

事有疑礙者在京合該衙門具奏取自 上裁凡進拜

表箋表文達 行在所箋文達 京師 一 禮部預行

經過所在軍民衙門候 車駕至官吏生員耆老朝見

及預行北京畿內文武衙門令掌印官候 車駕至朝

見 一 祭祀 車駕將發奏告 天地 社稷 太廟

孝陵祭大江旗纛等神輒祭於 承天門其經過處

所滁州遣官祭滁陽王泗州遣官祭 祖陵鳳陽祭

皇陵祭淮關里遣官祭先師孔子望祭泰山沿途古先

聖賢忠臣烈士祠墳禮部預期奏聞遣官致祭將至北

京境上設壇祭北京山川等神 車駕至北京奏告  
天地祭告境內山川等神 一扈從在京馬步軍五萬  
人內馬軍一萬步軍四萬馬軍五千步軍五千充 駕  
前軍餘馬軍五千步軍三萬五千分五軍率領每軍馬  
軍一千步軍七千以都指揮指揮千百戶管領錦衣衛  
仍選將軍五百人校尉二千五百人力士二千人 一  
侍從五府都督各一員首領官一員吏六人吏部堂上  
官一員文選等四司官五員辦事官二十員歷事監生  
四十人人材五十人吏十人戶部堂上官一員北京等  
十二司官十三員辦事官十員吏二十四人禮部堂上  
官二員儀制等四司官七員辦事官十員吏十二人鑄

印局官一員吏一人匠六人兵部堂上官一員武選等  
四司官七員辦事官五員吏十五人刑部堂上官一員  
浙江等十二司官十二員辦事官五員吏十三人工部  
堂上官二員營繕等四司官十員辦事官二十員吏十  
五人都察院堂上官一員浙江等十二道監察御史二  
十四員辦事官五員吏二十四人通政司堂上官二員  
首領官一員吏六人大理寺堂上官一員左右寺官六  
員吏十人太常寺堂上官二員首領官一員吏二人贊  
禮郎四員協律郎一員司樂一員樂舞生二十人厨子  
五十人光祿寺堂上官三員首領官一員署官十七員  
辦事官六員吏三人厨子一千人鴻臚寺堂上官四員

首領官一員序班四十員鳴贊四員及通曉夷語者斟酌帶去翰林院內閣官三員侍講修撰典籍等官六員書制勅秀才八人及譯寫四夷文字監生十三人尚寶司官二員吏科給事中三員戶科給事中三員禮科給事中三員中書舍人四員寫誥秀才五人行人司行人十員太醫院堂上官二員生藥庫官一員醫士摘選十分之二吏三人欽天監官三員天文生十五人教坊司奉鑾韶舞司樂各一員俳長色長樂工斟酌用之一扈從文武官軍人等陸路文武官員人等寫制誥秀才譯字監生緊用供應醫士天文生及各厨役人等俱給馬騾驢匹官給外脚力驢給鈔六十錠自備

辦事官監生人才吏典及醫士厨役等非緊用者人給脚力鈔二十錠隨伍官員將軍校尉力士旗軍每二人給驢一匹如不敷亦給鈔六十錠自備水路俱應付船隻遇陸路應付車輛一緣途各站每站增馬二十疋

令附近衛所馬軍內差撥仍令附近有司備車一百輛無車之處起夫五百人聽候一經過處所支給糧草扈從官員人等日給行糧二升馬日給料四升草一束驢料一升草一束一車駕將發宴在京文武群

臣賜扈從文武官員軍校人等鈔公五十錠候四十二錠伯三十錠一品二品二十錠三品四品十五錠五品十二錠六品七品十錠八品九品八錠未入流及辦事

官將軍總小旗人鈔七錠將軍及各衛總小旗人鈔六錠監生秀才吏典人材醫士樂舞生軍校力士厨子工匠人鈔五錠軍伴皂隸樂工人等人鈔四錠在外衛所扈從及各處駐劄官軍依京衛官軍例給賞 一 車駕至北京宴文武群臣耆老 賜官員人等及命婦鈔其嘗守城命婦論次行賞 一 恭遇 萬壽聖節公侯駙馬伯文武官四品以上近侍官及監察御史預宴五品以下并辦事官監生秀才吏典軍民工匠人等依例賜鈔一錠 一 五軍六部都察院大理寺錦衣衛各鑄印信通政司鴻臚寺各鑄關防 一 扈從官員有牙牌者隨身懸帶以憑關防出入 一 經過郡縣分遣延問高年 賜幣帛酒肉 一 經過鳳陽 陵戶及親戚人 賜鈔六錠耆老迎見者人鈔三錠泗州 陵戶親戚耆老迎見者賞如之

宣宗宣德五年九月 車駕巡近郊冬十月丙子 車駕

發京師駐蹕玉河 諭成國公朱勇等曰今農收雖畢而禾稼在場民間公私之費皆出於此扈從官軍不許入民家有所求索違者處以重刑其申 令各營悉知之 丑午駐蹕雷家站 召學士楊士奇楊榮金幼孜

楊溥問曰唐太宗過此非征遼時乎衆對曰然 上曰太宗恃其英武而勤遠畧此行所喪不少帝王之鑒戒

也又問此山崩於順帝時人率謂元亡之徵卿等以爲如何衆對曰順帝自是亡國之主雖山不崩國亦亡上曰此言正合朕意昔聖帝明王之世未嘗無災異大抵國之存亡係其君德之仁與不仁而已戊子回鑾駐泥河壬辰車駕至京師九年九月上將率師巡邊命蹇義楊士奇楊榮胡熒楊溥吳中等扈從癸未車駕發京師丁酉駐蹕洗馬嶺庚子回鑾武宗正德九年二月帝始微行十二年八月上出居庸關至懷來宣府等處游獵邊將江彬輩導之也先是彬與邊將許泰劉暉等皆有寵于上賜姓朱氏號外四家與上在豹房同卧起狎近而彬寵尤盛屢導

上出宮游戲近郊至居庸關巡關御史張欽閉關上疏不聽遂遠出關外楊廷和等累疏請回鑾且言居庸臨邊北虜不時出沒爲患正統末年之時未遠可爲明鑒不聽九月上幸大同獵陽和虜以衆數萬掠應州上命諸邊將擊之虜尋引去十三年春正月郊祀畢上復出關游十月二日太皇太后王氏崩上還京四月朔上以太后將祔葬詣天壽山祭告遂往黃花鎮密雲等處游獵五月未旬上還京六月虜入軍夏塞上復議北巡楊廷和等諫萬乘不宜輕出上不聽乃自稱威武大將軍太師鎮國公朱壽巡邊又欲以朱彬爲威武副將軍扈從以行

命內閣草一勅。廷和語毛紀，具疏連名上之。疏畧曰：人君承天命以爲天子，四方萬國皆其臣妾。今乃假稱威武大將軍國公名號，下同臣庶，天地易位，冠履混淆，自古及今未之有也。邇者皇上時出巡游，天下人心無不疑懼。柰何又復爲此萬一宗藩之中，或有援引祖訓指此爲言，不知陛下何以應之。又或以朝無正臣，內有奸邪爲名，不知陛下之左右及臣等代言之臣，又將何以自解。臣等戮身亡家，固不足惜，但恐朝廷之上禍亂或從此始耳。此臣等之所以日夜痛心疾首而不敢以自默也。疏上不省。時上必欲內閣草勅，屢遣中官促之。楊廷和稱疾不出。上御左順門。

召梁儲面促草。勅儲奏曰：勅不敢草。上曰：何乃逆。命對曰：凡事可將順，獨此勅不敢草。上曰：何不敢對曰：陛下爲君，乃自卑而列於臣。臣草勅，是以臣名君，故不敢。上大怒，手劍立曰：不草。勅齒此劍，儲免冠解帶伏地流涕曰：臣逆。命有罪，願就死。若草，勅則以臣名君，臣死不敢奉。命良久，上亦察其誠，擲劍而起。更命廷和草之。旣而禮部尚書李遜學等廷議欲建儲居守，時朱寧陰受寧主宸濠賂，謀入寧世子司香。太廟江彬亦欲立所厚遠藩，各陰有所主。梁儲厲聲曰：皇上春秋鼎盛，建儲未宜輕言。萬一有他，吾輩伏斧鑕矣。邪謀豈可聽。狗王瓊、王鴻儒。

亦助言之謀遂寢。八月，上北巡出居庸關，遂歷宣府至大同。九月，上在大同。冬十月，上自偏頭關渡河幸榆林。十一月，上在榆林。十二月上在榆林。十四年春正月，上在榆林。二月初旬，上自榆林還京師。王<sub>三</sub>上欲巡視秦岱，歷徐揚抵南京，下蘇浙，浮江漢，登武當，且遍觀中土繁麗諸處，都下人情恟恟。時江西寧藩又蓄異謀，俟釁而發，內外咸以爲憂。於是翰林修撰舒芬等約諸同志上疏乞留，俱會闕下。吏部尚書陸完迎諸上，疏者曰：「主上聞直諫，輒引刀爲劾狀，今且撒賴矣。其容色辭氣盡歸咎於上，以沮言者。一時言官又多其黨，遂爲所沮。」芬乃邀

吏部郎中夏良勝、儀制郎中萬潮、太常博士陳九川各疏連上。太醫院醫士徐鏊以醫諫，又明日吏部郎中張衍慶、禮部郎中姜龍、兵部郎中黃鞏、孫鳳、員外陸震、刑部郎中顧棠、率部僚合疏入。又明日工部郎中林大輅等大理寺正周叙等行人司副余廷瓚等並連名疏入。於是上大怒，下黃鞏、陸震、夏良勝、萬潮、陳九川、徐鏊于錦衣衛獄。命舒芬、張衍慶、姜龍、孫鳳、陸倬等百有七人跪于午門外五日。林大輅、周叙、余廷瓚等二十餘人俱下獄。明日，同黃鞏等六人亦跪五日。於是數日京師陰霾晝晦，人情震駭。宮城內海子水溢四五尺，折橋下鐵柱，有金吾衛指揮張英明言：「車駕出必不利。」

乃肉袒露刃于胸以死諫於是相旨命錦衣衛將舒芬等百有七人俱午門前各杖三十為首者調外任不調福建市舶副提舉餘俱罰俸半年夏四月命錦衣衛將黃鞏等六人午門前杖五十徐夔發充軍鞏震良勝潮九川俱為民林大輅周叙余廷瓚杖五十降三級調外任其餘俱杖四十降二級調外任時被杖而死者陸震余廷瓚主事劉校何遵評事林公黼照磨劉珏行人孟陽李紹賢劉平甫李翰臣詹軾十有一人車駕遂不果出雖士氣少振江彬姦謀少沮而國體亦少損矣八月下詔南征大學士梁儲蔣冕扈從時王守仁擒宸濠捷音猶未至京諸邊將在豹房者

各逞所見獻擒宸濠之策上亦欲假親征南游太監張忠等見錢寧減賢事敗又欲因此邀功上出師駐蹕良鄉都御史王守仁擒宸濠捷音至入奏上令遣回待至南京另奏大學士梁儲蔣冕以宸濠就擒江西已寧屢請回鑾不聽九月上至南京十月上在南京禁約人民不許養猪及易買宰殺違者發極邊衛俱充軍以猪音同國姓也遠近流傳旬日之間各處城市鄉村居民將所養猪盡行減價賤賣十一月上在南京十二月上在南京十五年正月

上在南京欲就南京舊壇大祀天地梁儲等言南北配位不同且典章不可紊乃止二月上在南京

楊廷和毛紀疏請回鑾謂大祀之禮行於正月

社稷之祀舉在仲春孝貞皇后大祥在二月二日禮

應即時祔廟今改卜至再甚為非宜天下朝覲官員

吏部考察上請未奉定奪各官離任既久政務悉廢

殿試進士之制亦已踰期自去秋聖駕南行至今八

月有餘在京在外各衙門題奏俱未蒙發出施行伏望

亟賜頒師還京舉行前頒大禮各衙門題奏文書

早賜發出毋致事務久稽有生他虞不報夏四

月上在南京五月上在南京六月上在南

京秋七月上駐蹕南京既久復有游蘇杭泛江浙

汴湖湘登武當之意畿內郡縣供給繁難梁儲蔣冕自

執書奏懇請回鑾泣跪於行宮門外自未至酉上

遣中官取奏入且諭之起對曰臣未奉旨不敢起

中官復出傳旨云已知道日下便要回鑾儲等乃

起八月上在南京九月上在南京群黨欲自

獻俘襲功張永曰昔未出京宸濠已擒柰何襲之於是

以大將軍鈞幟令王守仁重上捷音守仁乃節畧前奏

入諸人名于疏內上之上始議北旋十月上自

南京班師凱旋十二月駐蹕通州十六年春正月

上還京

世宗嘉靖十五年三月上欲擇壽域奉皇太后謁

萬壽山陵遂行十八道嶺李時夏言顧鼎臣廖道南郭

助扈從 壬戌祀 文皇帝于平臺山言行帳火暨勛  
時帳俱燼言所收奏章五通亦燼翌日泛舟西湖上  
製泛舟賦 命和時勛以災疏謝言不謝 上切責之  
輸罪乃已 夏四月作 幽宮 上復幸西山視工  
八月 上復如天壽山遷 孝肅太皇太后神主於  
裕陵 孝穆皇太后 孝惠太皇太后神主于 茂陵  
各享殿夏言李時扈從還告 內殿 十七  
年夏四月庚戌 上如平臺山以 文皇 馭蹕之所  
命建亭崇祀 十八年二月十六日 駕出京南詣湖  
廣承天府視計 顯陵先是 獻皇后崩 上與群臣  
詳議合葬 顯陵會錦衣衛趙倭自承天四言 玄宮

有水又有言 顯陵土壞故 震位久虛者而尚書汪  
鉉亦言當遷入 天壽山 上乃決意南巡躬閱 冊  
立 皇太子監國以宣城伯衛鐔等為留守使起翟鑾  
為行邊使顧鼎臣同留守張瓚參預機務太監麥永協  
守及分守京城官十人 賜鼎臣 勅曰朕幸承天已  
冊東宮監國特留卿贊輔協董文武重臣居守內自  
掖廷外而都城遠及邊鄙百司庶務悉以付卿事須入  
告者以 賜印密啓 乙卯 駕發 丁卯次衛輝

行宮火陸炳負 帝出燄中 四月庚辰 回鑾 詔  
天下曰朕以菲才叨承 天眷君茲黔首主御華夷所  
事者人極重焉故首正父子天倫之正復崇 考廟當

有所宗適者積愆殊深累于天慈聖鸞輿遐邁哀徒摧  
五內之傷鳳寢丹園禮厥宣二親之共匪自經營何  
慰夙夜乃於今年春仲之十有一日奏告於天地  
宗廟社稷徧達於百靈衆秩於十有六日駕徂荆  
楚之舊藩躬視承天之嚴寢月二十有五駐蹕龍  
飛內之卿雲宮齋潔肅誠定禮備樂有五日元吉祇  
奏告大祀于皇天奉皇考睿宗獻皇帝上配報生  
恩而謁顯陵答神功而祭社稷以及道經之望徧兼  
舉諸王群職迎覲獻誠雖未如四狩之巡亦以見省方  
之意且朕何人敢外堯舜祇欲伸送終之道以求永世  
之安庶幾教天下也今玄寢之制置旣詳親體之  
尊安攸定但念本根所在百姓繫懷勞擾久時民艱當  
軫承天府免明年田租五分之一北直河南二處亦與  
免明年三分之一用見朕懷恤之意期以今三月二十  
三日還京嗚呼慎終思永立愛敬以式臣民終始永藏  
建中業以遺孫子尚賴忠賢匡于至治詔爾華夏宜  
悉知之

南巡儀注

一先期上親奏告皇天于玄極寶殿同日告聞  
皇祖太廟皇考睿宗廟遣官分告北郊成祖  
列聖群廟大社稷帝社稷朝日夕月天神地  
祇用祭服太常寺備脯醢酒果翰林院撰告文一較

祭於承天門遣官祭旗纛之神用牲醴制帛三獻如常儀一駕發出正陽中門后妃輦轎後隨錦衣衛設欽製武陳駕備輦輿儀仗等項扈行本衛選精壯旗校八千人內以六千人專管擡奉上座輿輦二千人專管擺執駕儀及一應正直巡綽傳宣等用選委千百戶一百二十員分投管理各分撥班接替行太僕寺調取寄養馬三千匹免給各旗校更迭騎坐以錦衣衛指揮克前驅使領千百戶等官先往肅清道路簡命武職重臣二員留守京城兵部尚書一員叅贊機務各請勅行事以文職大臣二員總督整飭宣大等處軍務一員提督薊州山海關等處地方邊備文職重

臣一員充行邊使往遼東薊宣大鴈門固原等九邊閱視邊備戶部齎銀隨去勞賞官軍各請勅行事兵部奏請皇城四門京城九門大明門外兩邊守門文武大臣各一員坐邊官侯伯二員增設守門官軍用科道官點閘京城內外巡捕官軍行團營再選有馬官軍三千員名分爲兩班酌派五城地方與同舊有官軍巡邊仍選委坐營官及各提督把總等官晝夜巡捕安定德勝門各土城門外及鄭村壩大黃莊居庸關白羊口六處地方該營揀選有馬官軍每處一千員名分爲兩班輪流下營防守安定德勝門土城各用東西官廳正總兵官一員其餘各用叅將一員統領下營叅將倒馬

二關保定撫鎮官揀選精銳有馬官軍每關一千員名  
分爲兩班每月輪流下營守把各委坐營官一員統領  
一兵部於團營東西官廳御馬監勇士內揀扈駕官  
軍六千員名給兌馬匹內執武陳駕儀一千人總兵官  
一員領之 駕前後各二千人叅將二員領之 駕左  
右各五百人翼 駕行左右副叅將領之及行文沿途  
撫鎮等官調撥兵馬中駐扈 駕先期戶部請 勅命  
侍郎一員率屬官六員帶領太倉銀三十餘萬兩前去  
沿途整理官軍糧料工部請 勅差郎中一員同內官  
監督理沿途橋道及 行宮席殿禮部行南北直隸浙  
江等十三布政司凡有要緊重事俱達 行在所奏聞

其餘事務俱達在京通政使司照常封進各該衙門啓  
請 皇太子令旨行其事有疑礙者各差人赴 行在  
所奏取 旨各處拜進表箋除歲例等項赴在京禮部  
照常類收啓請司禮監官捧進其特賀大禮不係常典  
者原差人恭詣 行在投進 一扈從官五府堂上官  
各一員首領官各一員吏各一人吏部堂上官一員文  
選等四司官各一員辦事官六員吏六人戶部堂上官  
二員浙江等十三司官各一員辦事官二員吏十三人  
禮部堂上官二員儀制等四司官共六員鑄印局官一  
員辦事官六員儒士三人吏十二人鑄印匠四人兵部  
堂上官一員武選等四司官共六員辦事官一員吏六

人刑部堂上官一員浙江等十三司官各一員辦事官一員吏十三人工部堂上官二員營繕等四司官共十員辦事官二員吏十人都察院堂上官二員浙江等十三道監察御史各二員辦事官四員吏十三人通政司堂上官二員首領官一員辦事官二員吏二人大理寺堂上官一員左右寺官二員辦事官二員吏二人太常寺堂上官六員首領官二員屬官十員吏一人執事人役四十人厨役三十人光祿寺堂上官二員四署官四員吏四人厨役二百人太僕寺堂上官一員首領官一員吏一人鴻臚寺堂上官俱從司儀司賓各一員鳴贊四員序班十六員通事四員翰林院堂上官并講讀等官

四員制勅誥勅二房官共二十員譯字官生四人吏十人尚寶司官四員吏一人六科給事中十二員吏六人中書舍人一員吏一人行人司行人十員吏三人太醫院堂上官五員御醫吏目八員聖濟殿醫士選帶三分之一吏二人欽天監堂上官一員博士等官八員天文生陰陽人共十人吏一人教坊司奉鑾韶舞司樂八員俳色長樂工二百人扈從文武內外官及各項人役合用夫馬驢羸車輛廩給口糧各項應付事宜兵部定擬奏請轉行在外有司一體應付內府印綬監收貯先年行在衙門印信關防禮部領出給付各扈從官使用尚寶司給領文武字樣牙牌一駕發留

守大臣率在京文武衙門官員各俱吉服先期赴宣武門外彰義關候送。駕過退扈從官分程先發在途俱免朝參候。駕惟禮兵二部鴻臚寺太常寺科道糾儀官從行光祿寺隨路預辦。御膳酒飯供具凡遇行宮進膳處所各該撫按守巡兵備等官選委精壯官軍披帶盔甲器械拱衛。乘輿不許誼譁錯亂違者聽錦衣衛即時具奏拏問其扈。駕官軍戶部給散行糧工部辦鍋竈不許分外索害有司及人民舍混擾違者許被害等人赴撫按衙門告治仍行隨。駕緝事官校訪拏重治各該軍衛有司不許分外科斂違者聽撫按官體訪指實叅寃重治各衙門跟隨吏書人等各照兵部原行關文於軍衛有司驛遞衙門應付不許分外多索其應付衙門亦要即時應付毋得遲悞違者俱赴所在官司告治經過駐劄地方原有商賈店舖開賣飯食等物照常市買不許躲避亦不許從。駕人員用強輕價勒買違者許被害之人即時告治兵部咨行各該巡撫官預先出給榜文曉諭。一經過處所真定望祭北

嶽恒山之神用牛犢羊豕。上具常服行禮如常儀五府九卿巡撫大臣吉服陪拜衛輝遣官祭濟瀆之神用太牢鈞州望祭中嶽嵩山之神榮澤祭河神俱用太牢行禮如北嶽南陽遣官祭武當山之神用牲犢沿途古帝王聖賢忠臣烈士祠墓禮部查訪預期奏聞遣官致

祭帝王用太牢次用少牢又次脯醢酒果凡祭翰林院撰祭文 一各處撫按并三司官俱於所屬境上候駕先赴行在鴻臚寺報名 駕至行宮各俱吉服朝見所過府衛州縣官吏生員耆老人等俱于三十里外候迎道傍跪叩頭 駕過退 駕至 行宮鴻臚寺引見俱行五拜三叩頭禮 一各處近路 王府許 親王具常服預先出城候 駕其餘 宗室俱不許擅離府出迎 一 親王迎接先期 命文武大臣侍於途王於道傍拱立文武大臣下馬侍 上左右禮部尚書跪奉某王某恭迎 聖駕見內侍官引 王至 駕前跪行叩頭禮禮部尚書進立于 上前候 旨承 旨

訖起立傳 旨示 王隨至 行宮 上入少憇 王具冕服 欽定文武大臣於殿內左右侍從從官於丹墀東西侍班候 上陞座鴻臚寺官引 王由殿左門入至拜位贊行五拜三叩頭禮畢 上命 賜宴內侍官引 王於別次少候從官叩頭如常儀 王宴畢遣大臣伴送回府 駕還先以書止諸王勿煩出送 一

上臨舊邸恭詣 皇考睿宗獻皇帝廟謁告 儀具祠祭司

越四日行祭告 皇天禮於 龍飛殿丹陛奉 皇考

睿宗獻皇帝配是日 上更皮弁服詣 國社壇及山

川壇行告祭禮次日恭謁 顯陵 儀見祠祭司 次日從 駕

官上表賀遂頒 詔前期一日鴻臚寺陳設表案詔案

於龍飛殿中錦衣衛設隨駕朝儀及迎詔綵輿  
香亭於丹墀教坊司設中和韶樂百官各具朝服地方  
官吏師生耆老人等俱隨班行禮是日早鳴鍾鼓上  
具冕服御後殿執事官行禮畢上陞殿鳴鞭欽天監  
官唱時鴻臚寺贊入班贊四拜興平身唱宣表宣表官  
宣訖贊俯伏興四拜興贊頌詔翰林院官捧詔授  
禮書禮書捧詔置雲盤內叩頭興由殿中門出置綵  
輿內錦衣衛官校舉輿教坊鼓樂前導百官趨出候於  
龍飛門外鴻臚寺贊入班行四拜禮贊跪宣詔畢  
贊俯伏興搯笏贊舞蹈山呼出笏贊四拜興平身禮畢  
禮部尚書捧詔出騰黃奏差行人等官頒示天下

一 聖駕回京 上親奏謝 皇天上帝於玄極寶殿  
同日告謝 皇祖太廟 皇考睿宗廟如常儀文武官  
吏該陪祀者俱具祭服陪拜遣官分告 北郊 成祖  
列聖群廟 大社稷 帝社稷 朝日 夕月 天  
神 地祇太歲旗纛都城隍等神 承天門之神俱行  
禮如初 一百官上表稱賀如常儀

### 東宮監國事例

一 東宮朝駕儀仗等件 勅內府各該衙門先行造  
辦 一請 勅欽命輔臣一員居守京師保護 皇儲  
一應軍國機務悉聽啟行 一在京文武衙門遇有內  
外軍機各 王府緊要重大事務悉奏請處分其有各

處啓報聲息即調邊軍勦捕仍遣人馳赴 行在所奏

聞 一 皇城四門京城九門比常皆增撥官軍守護

留守武職大臣同叅贊尚書仍每日操閱軍馬各衛衙

門稱奉 令旨調遣官軍及處分事務所司須覆啟施

行 一五府九卿各衙門凡有緊要重事俱達 行在所

所奏聞其每月進繳精微監生考勤宴賞鈔錠官軍俸

糧及五府比試等項俱照常啟行 一祭祀凡遇 忌

辰 陵祭各常典祭至期太常寺啟請取 令旨遣官

行禮 郊 廟 社稷之祭候 勅命行 一各處拜

進表箋特賀大禮不係常典者原差人恭詣 行在所

投進其進賀 中宮 東宮箋文俱在京禮部類收司

禮監官捧進 一各 王府進 慈孝獻皇后香并南

京進香官朝鮮國吊使禮部啟請 命司禮監官捧進

几筵照例給賞綵段鈔錠 一吏部會推在京堂上官

六科都給事中在外方面官知府俱行在吏部奏請擢

用其大選急選并取選遠方監生及考滿復職等項俱

循例啟行 一各 王府請給 誥命勲臣襲爵歿後

追封兩京堂上官贈謚公侯伯内外文職官員請給

誥勅兩京三品以上官廕子各處土官襲職俱 行在

吏部奏行其官吏人等丁憂查放起復官員附選查題

散官等項俱照常啟行 一兵部推補兩京五府錦衣

衛在外總兵叅將各都司掌印僉書俱奏請其大選軍

職查黃續黃官舍襲替優給土官襲替及保用通事把  
事隨司辦事長官等項俱啓裁度 一各處奏報邊功  
覈勘明白應該陞賞等項俱啓請行 一在外撫按官  
劾奏不職文武官文官方面以上武官叅將以上奏聞  
待報 一京衛軍士冬夏布絹及邊衛軍士各衣布花  
襖但係年例給賞等項錢糧該衙門啓請行 一在京  
各邊鎮遇有緊急調用馬匹啓請調取兌用 一在京  
各衙門赴 行在奏事人俱兵部啓請給關應付 一  
各 王府奏訴重情辯復爵位祿米者俱詣 行在所  
奏聞其請名請封請婚等項在京俱啓行 一天下歲  
貢生員到部者該部查照事例啓行 一四夷朝貢人

員到京一應賞宴該部照例啓行 一法司問擬罪犯  
除重囚例該覆題及京官軍職犯人例該叅提俱奏請  
定奪 一刑名凡內外大小官員有犯具啓准問者問  
之若所犯情重該衙門具由奏請待報 一都察院點  
差各處巡按御史具奏 行在餘差及考察公差回道  
御史俱啓行中間有推姦避事賊濫不職者具奏 一  
通政司每日收過奏題本照常封進下科發抄各衙門  
啓行其有疑礙難行者差人赴 行在取 旨 一大  
理寺審錄罪囚詳擬罪名干係生殺并提問大小京官  
具奏其每月繳刑部都察院問過囚犯奏本照常啓行  
俱送科備照

十八年三月辛巳 駕幸純德山立表于 陵寢之北

戊子其閱 顯陵調 行在禮官曰此中 聖靈安悅

慶流子孫新擇諸所悉已之 行宮勿復治 四月甲

子 上幸大峪山召嚴嵩諭曰大峪地勢空淒豈如純

德山完美謹奉 慈宮南柎 二十三年嚴嵩言 陵

工告完歲清明日請詣 陵行春享禮從之

穆宗隆慶元年七月傳諭 聖駕幸藩邸科臣言 皇上

厚德不忘舊跡固臣下所宜將順但期祥未邁遂肆燕

遊似非所宜不聽 二年三月傳諭二十六日往觀上

林苑海子扈蹕止用京營軍無煩冗費閣臣言宮舍辭

勸止不允 是月丙子 上幸南苑先是左右有言南

海子之勝者故欣然欲觀是日 駕至則荒莽沮濕宮

館不治 上亦悔之遽 命遷蹕



120 / 123

